

Pap Sawnz Lik Reu Yaang

Raan Trawng



Cumz lik Reu Yaang

Kiarz 9 wit 2019

Pap Sawnz Lik Reu Yaang

Raan Trawng

Riang Post-primer

ယင်း သင်ပုန်းကြီးအလွန် ဖတ်စာအုပ်

Ihz taemz lik	Cumz Lik Reu Yaang
Ihz Caet	Cumz Lik Reu Yaang
Ihz taemz raang	Ai Yawn Kap
Mony	Reu Yaang
Laehz	1 laehz
Seu ngihz	Kiarz 9, 2019

Author	Riang Literacy Committee
Editor	Riang Literacy Committee
Artist	Ai Yawn Kap
Language	Riang
Edition	1 st Edition
Date	September 2019

Mony Seumz

Pap sawnz lik Reu Yaang raan trawng an ni naeh ta kuanz sawnz a wa mawz raan seun teungz keui nahz. Keuiz daz pa tang ta ihz a wa mawz rawz, mawz taemz keui nahz kaw cao bawnz boh. Aez kuanz mai Reu Yaang keui raw trawng truz ne ehz naeh cumz kawz lik Reu Yaang keui khatz phawmz cih mok.

Pap lik an ni a wa keunyz baaiz, a wa laep baaiz kaw ehz nam yaak daz. Kawp daz cumz kawz lik keui kaw maat ti cih plaez pap lik ceun ni. Keuiz daz beuk khatz phawmz sawnz mawn kaw caang raw trawng boh.

Kawp daz tuh z pap an ni maang kaanz sawnz boh seum rih keu ni kreuk lak raan seun teungz sawnz. Keuiz daz sawnz leh thanz paw nam caang mawz kaw nam anz laai. Aez kuanz mai Reu Yaang keui maang daehz nahz pap lik heungz heungz, aez caang rawz heungz heungz ne ehz yeung khatz phawmz cih.

Pap an ni aez maen kuanz ihz, ihz mawh tang ihz thao keui nahz. Eh z sunz aez keum rang kuanz mai Reu Yaang temz kyehz, temz mawh keui ngaz khatz phawmz sawnz. Aez kuanz mai Reu Yaang keui raw trawng daehz nahz.

Baetz

Pap Sawnz Lik Reu Yaang	1
Raan Trawng.....	1
Mony Seumz.....	5
Kaanz Sawnz (1) Mony reu haaiz Reu Yaang	1
Kaanz Sawnz (2) Kiarz woc ngohz	3
Kaanz Sawnz (3) Plaai reung dengz tawiz weng	5
Kaanz Sawnz (4) Saengz an buiz mok tuhz na	7
Kaanz Sawnz (5) Trawsz seuk sam	10
Kaanz Sawnz (6) Ihz bumz plu caang penz yawz ka	12
Kaanz Sawnz (7) Nam taan yeung, yak yeung	14
Kaanz Sawnz (8) Khianz nuarz	17
Kaanz Sawnz (9) Seu kawlz aarz kiarz	19
Kaanz Sawnz (10) Tiangz omz kumz kumz	21
Kaanz Sawnz (11) Kuanz ihz lao keu sangz	24
Kaanz Sawnz (12) Raangz an rak	27
Kaanz Sawnz (13) Kaam, Nyaan, Wiriyahz	30
Kaanz Sawnz (14) Omz boh ngal	33
Kaanz Sawnz (15) Kaaiz Nyaak	36
Kaanz Sawnz (16) Laai damz lek	39
Kaanz Sawnz (17) Koiz laac	42
Kaanz Sawnz (18) Reu ingz	45
Kaanz Sawnz (19) Peuk seumz khaehz	48
Kaanz Sawnz (20) Waap phawmz wot	51
Kaanz Sawnz (21) Taanyz Yol raas	54

Kaanz Sawnz (22) Ihz damz pæhz	57
Kaanz Sawnz (23) A keoz ihz phawmz rak	60
Kaanz Sawnz (24) Tahz pung naz ngaai lapz tualz	63
Kaanz Sawnz (25) Na	66
Kaanz Sawnz (26) Tahz tihz tawz	69
Kaanz Sawnz (27) Ceun ngur mas kung	72
Kaanz Sawnz (28) Laai damz yaerz	75
Kaanz Sawnz (29) I Paai kaar I Yo	79
Kaanz Sawnz (30) Yen ngæe waiz meoz	83

Kaanz Sawnz (1) Mony reu haaiz Reu Yaang




Kuanz mai Reu Yaang maang daehz nahz mony reu haaiz. Mony reu haaiz Reu Yaang kaw rak seum teuk ngarz. Beuk cih pawiz ca kahz, pawiz thamz, pawiz seu taang, pawiz keu thingz boh pawiz kiarz leun saamz keu ni Reu Yaang teur aacz daehz haaiz wang.

Beuk ngaz phraez kraao haaiz, kap kreung Reu Yaang kut haaiz, haaiz thonz taw prih thaangz. Keur meh tahz putz ceu waasz tang plaez reu haaiz tang kaoz. Keun nyah samz tahz thaw tawiz puatz, teur yawk tang tihz teur aacz daehz daz, “Anz keuiz.” Beuk prih a wa thaangz ihz thao keui samz teur aacz daehz suz aez seum suamz kaw a wa paw.

Seum Rih (1)

- 1A. Seum rih rawz boh seum rih taemz.
ngarz, pawiz, kreung, ceu waasz, teuk ngarz, keu thingz
- 1B. Taemz lik tawiz raang.



2. Tawpz mony maanyz.
- (1) Reu haaiz Reu Yaang ne haaiz tawiz meuz pawiz ceun nae?
- (2) Meuz Reu Yaang haaiz ne keur meh keui cih seu naez, keun nyah samz cih seu naez?
- (3) Tomz awlz ihz haaiz a naez? Krai plaez lawng an meuz mih tomz awlz ne, ihz haaiz keui cih seu naez?
3. Ras sapz mah lik tawiz ti lawnz. (k, kh, n, p, m)
- (1) Tahz Muz lan ___ahz wiun.
- (2) Yah Nuh tahz ___oh lang kaang.
- (3) Meu ni ___aeh seu ngihz phit.
- (4) Kap siz naeh ___awiz seu taang.
- (5) I Uz keuh ___uanz mah ngaz lan humz omz.
4. Leh khaw cih aez penz thaeoz.
keun euiz, haaiz, kreung, pawiz, kiarz leun saamz
5. Rawz plaez ihz kaang daehz nahz lawng mony reu haaiz Reu Yaang.

Kaanz Sawnz (2) Kiarz woc ngohz



Kuanz mai Reu Yaang keui beuk phraeoz kiarz ngohz sinz, teur aacz daehz teur leh tihz. Teuk ngup cao cao tumz lan tho. Khaenz keun caan tang kaaiz seuk ngih daehz lan khahz woc ngohz.

Beuk phraeoz tawz maar, phreumz seu co caang kai teur aacz daehz woc ngohz. Beuk seu ngihz a waaiz teur aacz daehz phreumz suamz kaaiz seuk ngih. Cih mak prit nukz tang lahz nyuh rae suamz kaaiz daehz priangz priangz.


Beuk a wa saakz kaaiz kaw, teur aacz daehz woc thaengz ngohz. Beuk a wa borz kaw tumz weng tho lan humz omz. Beuk a wa kaw mial tumz weng tho weng lang kaang daehz klawhz ihz.

Seum Rih (2)

1A. Seum rih rawz boh seum rih taemz.

phraeoz, woc, kiarz, mial, klawhz ihz

1B. Taemz lik tawiz raang.



2. Tawpz mony maanyz.

(1) Tuhz lawng an ni, meuz lan woc ngohz ne Reu Yaang keui cih seu naez lan?

(2) Ihz woc ngohz ne cih suamz seu tuhz naehz?

(3) Meuz teuk borz ne keuh cih seu naez?

3. Ras sapz mah lik tawiz ti lawnz. (b, c, r, w, s)

(1) Ihz kai bawnz __uamz leung.

(2) Ihz __aang laac samz nam bawnz suamz naehz.

(3) Ruas __uasz proc proc.

(4) Keul __uasz aamz aamz.


(5) Poz wak poz __ial.

4. Leh khaw cih aez penz thaeoz.

maang, kaang, kai, keun caan, woc

5. Rawz plaез ihz kaang daehz nahz lawng kiarz woc ngohz. Maanyz truz pa tang lawng woc ngohz.

Kaanz Sawnz (3) Plaai reung dengz tawiz weng



Ihz ehz klawhz ihz lo mas mok ta plaai reung dengz tawiz weng. Tawiz ti maang ngal rong, ngal ngiar keui ngaz cih seu naez plaai reung dengz? Beuk ngaz plaai reung dengz ne lo yawt takz dahz tang takz kaaiz rae plaai lan.

Beuk plaiez ngal rong kaw lo deukz ngawm. Beuk plaiez ngal ngiar kaw lan bawnz nam maang phez naehz. Beuk plaiez ngal reu mit ne lo mok seu ti he deukz ngawm. An ni lo tang mok se se.

Yak aez kuanz ihz keui keulz tawiz reung dengz boh tawiz reung dengz law li. Meuz plaai reung dengz ne nam lo meun, nam lo khahz ngaw yawt naehz. Beuk daehz nuar teun khinz reung dengz ne, doz law li keui caang waz. Plaai tawiz ti ihz plaai kaw nam maang phez naehz. Ihz an nuar tawiz, plaai tawiz pakz peung keui tiunz lawt phez se se

Seum Rih (3)

1. Seum rih rawz boh seum rih taemz.
plaa, ngal rong, ngal ngiar, ngal reu mit, pakz peung

- 2A. Tawpz anz boh nam.
 - (1) Ihz ehz klawhz ihz lo mas mok ta plaa reung dengz tawiz weng. ____
 - (2) Beuk ngaz plaa reung dengz ne nam lo yawt takz dahz tang takz kaaiz. ____
 - (3) Beuk plaez ngal rong kaw yak plaa laz laz. ____
 - (4) Beuk plaez ngal reu mit ne lo ngawm raamz ceu nawhz. ____
 - (5) Plaa tawiz pakz peung keui tiunz lawt phez se se. ____

- 2B. Tawpz mony maanyz.
 - (1) Meuz plaa reung dengz ne lo mas lawng naehz?
 - (2) Beuk awlz ngal rong cih seu naez?
 - (3) Beuk awlz ngal ngiar cih seu naez?
 - (4) Beuk awlz ngal reu mit cih seu naez?
 - (5) Plaa reung dengz aez lawt phez ne ngaz cih seu naez?

3. Ras sapz kuanz lik tawiz ti lawnz. (o, u a, aw, eu)
 - (1) Ihz lan kh__hz wiun ruk.
 - (2) Ihz lan khahz k__lz.
 - (3) Beuk naeh kiarz cung, nyaam keui p__t tuhz baaiz.
 - (4) Teu Komz lan khahz keu c__h lawng rang.
 - (5) I Cang moh kaang deungz seu t__hz kaaiz.

4. Leh khaw cih aez penz thaeoz.
law li, reung dengz, phez, priangz, phraeoz

5. Taemz truz mus pruh an naeh rim daehz waiz pruh. Pruh keuh diz naeh plaakz
tha naez pruh daehz? Tuhz pruh keu diz maang naehz?

Kaanz Sawnz (4) Saengz an buiz mok tuhz na



Meuz diz maang ihz cih na hawkz, hnhz samz maang kuanz keur meh keu aarz, naeh ihz keum rang mawh, toz raang aatz samz raang laac baaiz yaetz seu ngih se se.

Paz keuh wonz daz thaz ngaai paarz ngaz suamz lan naehz? Naeh seu seu ngihz, paz keuh kaw daz, “Tuhz na tui ohz buiz mok saengz heungz baaiz, paarz lan lak leh raez.”


Kaar kaw seuz baaiz lan lak khahz. Hawkz lak thaz keun bongz, hawkz samz lak thaz seun daalz. Kaar lak a wa, keuz daz nam maang naehz. Paz keuh kaw daz thaengz kaar nahz, “Kuanz! Seu ni paarz a wa lak laep baaiz, sapz cakz ceu tuhz diz raez!” Kuanz hnhz kaar diz kaw cih ceun paz daehz lao. Ceu nawhz truz a wa penz teungz penz plaehz. Kaar kaw seuz baaiz. “Kuanz! Saengz an paz daehz sunz aez paarz nahz ne naeh keu ni luat.”

Seum Rih (4)

1A. Seum rih rawz boh seum rih taemz.

laac, buiz, saengz, keun bongz, seun daalz

1B. Taemz lik tawiz raang.



2B. Tawpz anz boh nam.

- (1) Kuanz keur meh hnhz keu aarz kai baaiz. _____
- (2) Paz keuh nam wonz naehz thaz ngaai kaar. _____
- (3) Hawkz lak reu keutz, hawkz samz lak reu lae. _____
- (4) Tuhz na ne, kaar lak bawnz saengz heungz baaiz. _____
- (5) Kaar kaw seuz baaiz meuz ceu nawhz truz a wa penz teungz penz plaehz. _____




2B. Tawpz mony maanyz.

- (1) Ihz cih na maang kuanz seu naeh? Naeh ihz ceun nae?
- (2) Ihz cih na, lao kuanz daehz nahz naehz?
- (3) Waaiz paz keuh lao ne, kaar lan cih naehz?
- (4) Waaiz kaar a wa lak ne, paz keuh samz lao thaengz naehz?
- (5) Saengz an buiz mok tuhaz na ne paz keuh sunz daz naehz?

3. Ras sapz kuanz lik tawiz ti lawnz. (o, oi, eu, aw, ae)

- (1) Keu p__nz, lahz traag tronz.
- (2) K daz kaang, R__ Yaang cih kaang daehz.
- (3) Mak prit nukz ne n__h seu tuhz Reu Yaang.
- (4) Teu Saeng lan khahz kahz tuhz omz r____ng Teun Hungz.
- (5) K__z wang cur wang raw teur klawp khaehz klaez.

4. Sapz teun khinz klawngz klaengz.



5. Rawz plaesz ihz kaang daehz nahz lawng a pum saengz an buiz mok tuhz na.

Kaanz Sawnz (5) Trawsz seuk sam



Meuz diz maang trawsz hawkz seuk sam baaiz. Seu naaoz an nae keulz kaw nam kai waaiz yawt ihz seu pawk. Beuk nam anz ti hnhz dawhz tae cih ceun diz se se.





Maang seu borz seu naaoz keu diz kaw leh lan putz Khaehz mawh hawkz. Peun keu dez aez naeh ceun ihz keu dez ne. Seu kum aez tang hnhz nahz pahz kaw keuh weng thengz Khaehz putz an diz. Meuz a wa laz baaiz trawsz an diz kaw a wa sunz yaetz baaiz. Upz hnhz ceun nae kaw nam rawhz. Hnhz kaw peun rawi mah paz daehz.

Paz trawsz kaw rawi ca, dawmz kawn tiz aez boh. Putz Khaehz ne kaw lawi sapz aez thaz cawng paz keuh. Pahz ne kaw wal wal sapz aez cawng paz keuh. Paz keuh kaw taz, raak mah keuh kawr. Mah keuh kaw rawi yawt naeh nahz putz Khaehz. Kawp daz kuanz trawsz seuk sam rae, paz keuh caang talz ceun diz.

Seum Rih (5)

1A. Seum rih rawz boh seum rih taemz.
 seu naaoz, keulz, borz, rawi, trawsz

1B. Taemz lik tawiz raang.

			
(1)	(2)	(3)	(4)

2. Tawpz mony maanyz.

- (1) Trawsz naeh tuhz a pum ne naeh trawsz ceun nae?
- (2) Meuz seu naaoz keui truz khahz keulz ne hnhz kai cih seu naez?
- (3) Seu naaoz keui cih mok aez nahz naehz?
- (4) Meuz trawsz an diz sunz yaetz ne hnhz cih seu naez?
- (5) Paz trawsz rawi cih naehz?

3. Ras sapz kuanz lik tawiz ti lawnz. (ng, t, h, y, ny)

- (1) Tuhz pruh ehz maang ___ah keu maaiz keu ponz.
- (2) Hnhz ruas ngawng ___aek.
- (3) Keur meh aez mawz taanyz, keun ___ah aez mawz kez.
- (4) Yah Uz rawi tawgz lang ___uhz sraakz.
- (5) Yah Maat mawz ___arz kreung Reu Yaang baaiz.

4. Taemz siupz lan aez naeh ta 3-5 thaeoz.
 Naeh seu seu ngihz...

5. Taemz truz mus teungz phrihz phrahz an thatz kaang daehz hanz meoz.
 Teungz keu diz ihz cih naehz?

Kaanz Sawnz (6) Ihz bumz plu caang penz yawz ka



Kuanz mai Reu Yaang ehz ne makz plu baaiz. Bumz se se. Tang keun nyah keur meh, ihz plung ihz thao bumz klawhz ihz.

Ihz bumz plu nam penz keum rang naehz, caang penz yawz ka heungz meoz baaiz ta ihz. Nam taan penz kaw caang penz, a saak daehz kaw caang patz. Kawp peu daz thaat an naeh tuhz mak mu an diz, caang aez ihz ehz penz yawz ka kaen sa.

Meuz maat penz yawz ka ne, tuhz mony ihz ehz caang penz pramz, te asz truz, penz truz keun dumz. Aacz maat penz yawz ka kaen sa, hnhz caang penz aacz ceun diz. Waaiz an diz caang kai penz truz yawz ka kaen sa mony asz.





Caang penz thaengz tang kaen sa, pahz paaiz keu ni. Beuk naeh yah keun meur keui caang takz pa tang kuanz ngaak tuhz klungz. Kawp peu ceun diz, plu an daz ne nam rak mawn ta ihz ehz nahz, khanz daz nam bumz baaiz rak ta ihz.

Seum Rih (6)

1A. Seum rih rawz boh seum rih taemz.

bumz plu, kaen sa, pramz, asz, pahz paaiz, kuanz ngaak

1B. Taemz lik tawiz raang.

			
(1)	(2)	(3)	(4)

2. Tawpz mony maanyz.

- (1) Ihz bumz plu caang penz yawz ka naehz?
- (2) Meuz maat penz kaen sa ne caang penz aacz naehz?
- (3) Tuhz mak mu ne maang thaat naehz?
- (4) Meuz maat penz yawz ka kaen sa ne caang penz aacz yawz ka naehz?

3. Ras sapz kuanz lik tawiz ti lawnz. (a, aw, aa, ae, eu)

- (1) Yangz sohz boh kingz l__m, dawmz dawmz teur khahz.
- (2) Pungz pahz boh yangz w__p, yaapz yaapz teur awlz.
- (3) Kaar kuanz m__h lan seuk tuhz kreung.
- (4) Kaar tahz yah lan maar kh__nz tang kaaiz seuk ngih.
- (5) Yah Saengz lan suamz caangz sawmz na k__h Tahz Muz.

4. Taemz siupz lan aez naeh 3-5 thaeoz.

Meuz diz neungz maang simz hawkz

5. Rawz plaenz ihz kaang daehz nahz lawng bumz plu. Taemz truz pa tang lawng bumz plu ta 2 thaeoz.

Kaanz Sawnz (7) Nam taan yeung, yak yeung



Meuz diz neungz maang tahz tangz hawkz. Hnhz ngaz lan khahz saz hurz daehz. Leh tang sang taepz, tang ngawng, cur lan lang kaang daehz, daz ngaz lae saz nawk pruh.

Lan tawiz reung dengz ne ngaz talz konz. Hnhz kaw raw biapz kaai teungz teun hungz mawh, waar reung dengz ne. Konz keu diz kaw truz teur baengz paekz daehz, tuhz keutz teungz teun hungz, an tahz hurz biapz ne.

Kamz diz moh thaengz nyaenz, hurz tahz an diz klaez khra khra cur. Konz keui kaw daz, “Phet, phet,” daz ceun ni rae teur aacz daehz tiunz lan hacz aamz. Paekz kaw nam leh leui, bucz boh a diz.

Tahz hurz ne kaw cur truz leh paekz, hnhz kaw seuz baaiz, thengz luat tang hurz daehz, weng lang kaang. Ihz keui kaw maanyz hnhz rae, hnhz kaw lao keuh daz daehz saz hurz bawnz.





Kamz diz samz maang ihz hawkz yeung hnhz. Leh tang hurz, tang sang taepz cur lan khahz saz hurz daehz. Khahz saz a naez kaw nam teutz, uiz kheumz thengz maat.

Seum Rih (7)

1A. Seum rih rawz boh seum rih taemz.

hurz, biapz, teun hungz, teur baengz, kheumz, conz

1B. Taemz lik tawiz raang.

			
(1)	(2)	(3)	(4)

2. Tawpz mony maanyz.

- (1) Meuz tahz tangz khahz saz hurz ne hnhz talz naehz?
- (2) Meuz hnhz talz conz ne hnhz cih seu naez?
- (3) Conz keui truz cih naehz tuhز eupz khaehz?
- (4) Meuz conz keui yeung teur baengz paekz ne naeh lan seu naez?
- (5) Ihz saz hurz ne cih seu naez bawnz truz paekz?

3. Ras sapz kuanz lik tawiz ti lawnz. (i, aa, ui, eu, u)


- (1) Eungz Nawngz R_ ne naeh tuhز nae weng Omz Plaeh.
- (2) Tuhz prih Khaez t__ kaw Reu Yaang moh heungz baaiz.
- (3) Daakz boz moh t_hz omz.
- (4) Ihz suamz praang omz ny___ngz lae, ihz nam aez kokz keu tolz.
- (5) Kuanz mai Reu Yaang m___z neungz sapz raangz khamz.

4. Taemz siupz lan aez naeh ta 5-7 thaeoz.

Keuh patz mak paw lungz

5. Lao plæz an daehz kai khahz bawnz keui naeh kahz naehz? Lan tawiz yaeh? Lan khahz thaz naez? Meuz bawnz truz samz deungz suamz seu naez?

Kaanz Sawnz (8) Khianz nuarz



Reu Yaang ehz meuz diz neungz nuarz kaw khianz leh daehz ne. Ihz teur ka peuk seumz seum puz, ihz teur ka kaw leh paw cae, ihz teur ka kaw leh teur haaaz keui. Kam daehz dawhz leh meoz an nae cih nuarz kaw bawnz boh. Kam daehz dawhz senz mawh, senz kyehz, puan puan kaw teur lan. Puan mok heungz heungz rae caang kai khianz. Ihz meuz diz rup mawz klawhz ihz.





Lo an hanz teur nae kaw, daehz taek leh kaai puan puan ne. Wawk sapz tuhaz kwaanz rae seun teungz khianz leuk. Beuk a wa ceun diz samz thaz ti puan puan ngaz dutz ne cih bawngz tuhaz nuarz rae mial khianz tawiz taw dutz. Meuz a wa ngaz dutz ne saetz teuk teutz puan puan. Cawgz puan puan ne phraez lae keu aarz rae seu plaakz ne siapz sapz tuhaz nuarz.

Nuarz keu dawhz, nuarz paez, nuarz kingz tongz, nuarz phatz, nuarz thaiz, nuarz law, nuarz kiuz, nuarz longz, senz mawh, senz kyehz, nuarz tukz klawhz meoz keui Reu Yaang meuz neungz keui mawz cih hacz.

Seum Rih (8)

1A. Seum rih rawz boh seum rih taemz.
khianz, seum puz, paw cae, teur haaoz, nuarz, kwaanz

1B. Taemz lik tawiz raang.

			
(1)	(2)	(3)	(4)

2. Tawpz mony maanyz.

- (1) Reu Yaang meuz neungz keui leh naehz cih nuarz?
- (2) Bawngz nuarz ne sapz meuz ceun nae?
- (3) Meuz khianz nuarz ne lo naehz?
- (4) Reu Yaang keui cih seu naez khianz nuarz?
- (5) Lao yawt mus nuarz keui?

3. Ras sapz reus lik tawiz ti lawnz. (h, z, hz)

- (1) Parih Meu Raan bo_ parah Thaiiz teur takz boh dae__.
- (2) Tuhz om_ rawng an ni kahz rac_ baaiz.
- (3) Keuh kha__ saz seu tuhz la__ ngiar.
- (4) Tahz Mon piut__ bawnz peur taaiz.
- (5) Kuanz mai Reu Yaang makz seu tu____ mak prit nukz baaiz.


4. Ras leh aarz khaw cih seu thaeoz.

Pung taek: Keuh thaiiz maar teun cung.

meuk, khaehz, peu nahz, nuarz, cung, mak, thaiiz, botz, klaez

5. Taemz a yawng hanz meoz. Taemz phrihz phrahz waiz meoz an maang a yawng keu diz. Pung taek, an rong ne maang teur lung praang, mak prit, naamz.

Kaanz Sawnz (9) Seu kawlz aarz kiarz



Seu wit naeh seu kawlz aarz kiarz. Lawng an ni naeh krai plaetz kuanz mai Reu Yaang cih kaanz klawhz kiarz. Beuk a wa phraezoz kiarz leun cengz, ihz thitz baaiz laeh, yaetz pao maar baaiz laeh. Kiarz leun kamz kaw anz.

Kiarz leun saamz mak baaiz laeh cao, leun saamz mon samz cih kaaiz yah khuhz. Kiarz leun si khahz mak baaiz laeh, kaetz baaiz laeh, keulz pawiz leun si mon.

Kiarz leun ha samz khahz keulz omz keulz pyaw. Kiarz leun rokz samz keulz pawiz reu waiz, cung a wa klaez teur nyaenz khahz khonz maar daehz, plihz baaiz tehz, baaiz kheumz, teur ka kaw plihz kaw khaez, baaiz laeh, lak ngah.





Kiarz leun cetz samz plihz ngohz, laakz kaw khaez, beuk ihz kaerz samz lan keulz seu meungz. Kiarz leun paet samz sawmz na, laakz lak ngah. Kiarz leun paet mon, paet yam samz raw cawngz cih kaaiz dawiz. Kiarz leun kao samz laakz ngohz.

Kiarz leun sipz samz mak lak ngah, woc kaaiz cao. Kiarz seu taang samz leh kaw khaez, keulz pawiz seu taang. Kiarz keu thingz samz woc ngohz na, keulz pawiz keu thingz.

Seum Rih (9)

1A. Seum rih rawz boh seum rih taemz
seu kawlz aarz, baaiz teh, yah khuhz, kaerz, keu thingz, kaaiz dawiz

1B. Taemz lik tawiz raang.

			
(1)	(2)	(3)	(4)

2. Tawpz mony maanyz.

- (1) Reu Yaang cih naehz kiarz leun cengz a?
- (2) Kiarz leun cengz taw kiarz leun saamz ne ihz cih naehz?
- (3) Beuk cung klaez Reu Yaang keui peuk seumz naehz?
- (4) Ihz mak lak ngah kiarz naehz?
- (5) Ihz woc ngohz maar boh ngohz na naeh kiarz naehz?

3. Ras sapz kuanz lik tawiz ti lawnz. (ia, oi, i, ua, eui)

- (1) Lo t__ngz omz kumz kumz.
- (2) Kuanz mai Reu Yaang k___ lo teur rak daehz.
- (3) Pehz maang k__nz mai seu naeh?
- (4) Tahz Paanz Pakz cih maar Baan r___z.
- (5) Soh z kaw meuk lawt teuk b___mz.

4. 2 khaw cih seu thaeoz. Aez naeh ta 3 thaeoz.

(hurz, peu nahz), (nuarz, paekz), (omz, pruh), (kaang, maang), (baaiz laehz, mak)

5. Beuk ehz ngaz cih mak prit nukz ne lo naehz naehz? Bawnz cih ceun nae?
Taemz hanz thaeoz.

Kaanz Sawnz (10) Tiangz omz kumz kumz



Lawng moh rak lo klawhz ihz. Kaai toz ihz waiz pun aarz pun ne naeh omz. Beuk daehz num keui, sraangz lae keui omz tuh z toz daehz caang yawm lan. Beuk omz yawm kaw, caang nam moh rak, caang penz yawz ka. Kawp ceun diz, teur seu ngihz lo tiangz aez seu khinz klaan. Seu khinz klaan ne naeh waiz teur dawngz.

Teuk ngup rawi truz tiangz seu laehz. Lo tiangz se se klawhz kraao. Meuz cih kaanz reu, meuz lan thaz nawk weng truz kaw lo tiangz, moh kaang kaw lo tiangz. Lo tiangz aez saakz saakz.

Lo tiangz aez klawhz seu ngihz. Beuk nam bawnz tiangz omz, phawmz kaw nam rak, phawmz patz sunz ca, teur ceus, te kheuk toz daehz. Beuk bawnz tiangz omz kaw, rawhz moh yoh, moh ngang. Omz ne aez lawng moh rak, aez lawng katz ngang daehz nahz klawhz ihz.

Beuk sunz aez daehz moh rak kaw lo tiangz omz teuk eumz ngang. Yak tiangz omz tawiz reung dengz, doz maang mah phrihz, doz kheuk toz daehz. Beuk rawhz reu baaiz kaw yak maat tiangz luat omz, doz takz pu waang. Moh aez sraangz ngatz caang kai tiangz.

Seum Rih (10)

1. Seum rih rawz boh seum rih taemz.
sraangz, tiangz, seu khinz klaan, teur dawngz, teur ceus, mah phrihz
- 2A. Tawp anz boh nam.
 - (1) Kaai toz ihz waiz pun aarz pun ne naeh omz. ____
 - (2) Beuk omz yawm kaw, caang nam moh rak, caang penz yawz ka. ____
 - (3) Teur seu ngihz lo tiangz aez seu khinz klakz. ____
 - (4) Seu khinz klaan ne naeh ponz teur dawngz. ____
 - (5) Yak tiangz omz tawiz kaang. ____
- 2B. Tawpz mony maanyz.
 - (1) Beuk nam bawnz tiangz omz ne ngaz naeh seu naez?
 - (2) Meuz naeh lo tiangz omz?
 - (3) Seu khinz klaan ne naeh seu naehz teur dawngz?
 - (4) Kawp naehz lo tiangz omz kumz kumz a?
 - (5) Kaai toz ihz ne maang omz seu naeh?
 - (6) Lo tiangz omz ceun nae?
- 3A. Ras sapz mah lik, kuanz lik boh reus lik tawiz ti lawnz. (pr, eu, aa, h, z, hz, eui, p, i, k)
 - (1) Kaang k__h nae_ teun khinz pruh.
 - (2) Ihz __uh a niz keui khatz phawmz cih kaan_ baaiz.
 - (3) Tahz Nyahz kha__ kahz.
 - (4) Reu Yaang k____ teur aacz daehz lo sawnz lik.
 - (5) Lik ne pehz ta ihz nahz seum _____eun tang.
 - (6) Beuk a wa teur w____l kaw yawt nahz tuhz tuhz lik wa tang.
 - (7) Beuk ngaz khahz cih naehz _____aw yoh.

3B. Ras sapz an tawz.

(1) Keuh khaenz _____ khahz kawngz witz kuk. (plah, plahz)

(2) Reu Yaang lo teum _____. (plawm, prawm)

(3) _____ tahz yah moh pruh Kaang Tong. (kaar, kar)

(4) Reu Yaang Baan Roiz keui moh thaz seun daalz weng Omz _____. (plaeh, plaehz)

4. 2 khaw cih seu thaeoz. Aez naeh ta 5 thaeoz.

(klaangz, ploiz), (keu tehz, khaehz), (kohz, mul), (suakz, ngal), (plahz, maar)

5. Taemz lawng an pehz cih kawr kaanz ihz kaang daehz aez naeh seu kawlz thaeoz.

Kaanz Sawnz (11) Kuanz ihz lao keu sangz



Meuz diz neungz maang ihz phawmz wot hawkz. Hnhz maang kuanz hawkz. Keuh moh a pruh. Naeh seu seu ngihz muz seuz keui luam lek rim pruh keuh. Ihz keu diz punyz teuk baatz lek hawkz. Lek an diz wang kut tuh z pruh keuh. Meuz ihz phawmz wot awlz lek baatz ne saanyz tiz kingz lek. Lek an diz kaw yam.

Hnhz leh lek an diz unz mok tuh z taen ngohz daehz. Meuz hnhz cih ceun diz ne kuanz hnhz kaw awlz tawiz. Moh seu co muz seuz keu diz tawiz dawmz lek baatz.

Keuh dawmz tawiz puatz cawng lek, awlz kut lan tuh z kaang ihz phawmz wot ne. Keuh maanyz ihz phawmz wot, “Anz mih awlz lek wang truz thaz niz?” Hnhz kaw daz, “Nam awlz.” Keuz daz kuanz hnhz samz ngaz lao ihz keu diz nahz. Meuz ceun diz ihz phawmz wot mas kuanz daehz ngaz lao rae ngaai aamz sapz kuanz daehz. Keuz daz kuanz hnhz samz daz, “Euz! Ngaai paz eh z deuiz baaiz ngaai lek tuh z taen ne.” Muz seuz keu diz kaw lan dawmz yawt samz naeh mawn. Awlz kuanz ihz daz ne lao keu sangz.

Seum Rih (11)

1. Seum rih rawz boh seum rih taemz.
kuanz, pruh, punyz, baatz, saanyz, puatz, aamz.

- 2A. Tawpz anz boh nam.
 - (1) Meuz diz neungz maang ihz phawmz wot hawkz. _____
 - (2) Hnhz nam maang kuanz. _____
 - (3) Ihz keu diz punyz teuk baatz lek hawkz. _____
 - (4) Hnhz leh lek an diz unz mok tuhaz taen ngohz daehz. _____
 - (5) Keuiz daz kuanz hnhz samz nam lao ihz keu diz nahz. _____

- 2B. Tawpz mony maanyz
 - (1) Tahz muz seuz khahz wiun aarz nae?
 - (2) Ihz phawmz wot ne unz mok lek a naez?
 - (3) Kuanz hnhz daz seu naez?
 - (4) Ihz phawmz wot ne cih seu naez sapz kuanz daehz?
 - (5) Muz seuz cih seu naez?

- 3A. Ras sapz mah lik, kuanz lik boh reus lik tawiz ti lawnz. (th, ph, e, iu, aw, o, eo)
 - (1) Ihz meuz diz rawi __aiz maar cao baaiz.
 - (2) Mih mawz cih kaanz seu naeh m__z.
 - (3) Mah p_hz anz lan teur laas?
 - (4) Mih lan __raeoz prih Thaiz seu naeh laehz?
 - (5) Yak t__nz thengz ti moh daehz.
 - (6) Cih kaw lo khatz ph____mz.
 - (7) Cih naehz beuk y____h wa baw khyaw.

3B. Ras sapz an tawz.

- (1) Lo teor yawng kuanz ihz _____. (kyehz, keh)
- (2) Yak cih peuk _____ ihz. (kreuk, kleuk)
- (3) Saengz _____ Meungz Kut, omz laep baaiz. (myah, myahz)
- (4) Dengz yaetz _____ baaiz. (khreurz, khleurz)
- (5) Yak aez ihz _____ bawnz daehz. (khyawz, khrawz)

4. 2 khaw cih seu thaeoz. Aez naeh ta 5 thaeoz.

(piat, mak prit), (ngohz, tenz), (riangz, tho), (teuk, kreung), (kuanz ihz, pruh)

5. Taemz lawng kuanz boh z daehz hawkz. Toz raang hnhz naeh ceun nae?
Taemz tang lawng daehz tomz lan teor tawiz, taemz seu kawlz thaeoz.

Kaanz Sawnz (12) Raangz an rak



Teu Mang dawhz raangz an rak da. Hnhz lan maanyz paz daehz, “Beuk sunz aez raangz rak ne ngaz cih seu naez?” Paz keuh kaw lao plaez hnhz nahz lawng raangz an rak boh raangz keun ra. Kuanz boh hnhz keui kaw truz teuk ngarz heungz baaiz. Paz keuh kaw krai aez, “Klawhz ihz lo maang raangz khaam boh raangz rak. Beuk ehz maang raangz rak, suamz naehz kaw waem bawnz rak rak, upz kaw cakz.

Aez raangz daehz rak ne ngaz bawnz cih seu naez? Lo khutz raangz seu ngihz aarz laehz. Teuk ngup meuz tamz rawi seu laehz, teuk borz meuz ngaz yaetz seu laehz. Leuz lak diz meuz daehz a wa suamz kaw lo khutz thaengz. Beuk khutz raangz se se kaw, raangz nam keu tisz, nam khraanz. Beuk nam khutz raangz ne, ngaz penz raangz keu tisz, raangz nyang boh raangz kas. Khlingz asz boh khlingz suhz kaw caang naeh.




Ti lany lany lo khutz teur seu ngihz aarz laehz. Lo cao kawn thoz raangz an keu ceum, beuk a wa kaw lo mok tawiz ti laep, ti aamz.” Kuanz boh hnhz keui teur aacz daehz teuk ngarz rak baaiz. Keuh kaw seuz phawmz cih tawiz klawhz ihz.

Seum Rih (12)

1A. Seum rih rawz boh seum rih taemz.

suamz, keu tisz, khraanz, khlingz, lany, kawn thoz raangz, raangz nyang

1B. Taemz lik tawiz raang.

		
(1)	(2)	(3)

2. Tawpz mony maanyz.

- (1) Teu Mang maanyz paz daehz lawng naehz?
- (2) Kawp naehz lo raangz an rak a?
- (3) Teur seu ngihz ne lo thoz raangz seu naeh laehz? Meu naehz?
- (4) Lo cao kawn thoz raangz ceun nae?
- (5) Beuk nam khutz raangz caang penz naehz?
- (6) Kuanz boh Teu Mang keui anz loz phawmz lawng raangz?

3A. Ras sapz mah lik, kuanz lik boh reus lik tawiz ti lawnz. (phr, io, oi, khw, cr, ia, ae)

- (1) Lahz kh__z boh baaiz kheumz seuk rawl naeh kuanz mai.
- (2) Ngohz seu langz naeh tahz __aiz.
- (3) __eumz reu, reu ne a wa phre caang humz omz.
- (4) Ihz plung keui keulz tuhz __awp.
- (5) Yak aez mah r__ keui truz cu seum suamz.
- (6) Beuk sunz mas phawmz ihz maanya m_____l phawmz daehz.
- (7) Yak lupz daehz, yak s_____hz ihz.

3B. Ras sapz an tawz.


- (1) _____ keuh peuk seumz moh kaw khaez. (sraakz, traakz)
- (2) Mih tukz nuarz ceun luang anz _____. (khreumz, khreum)
- (3) Lo mawz lik _____ ihz. (klawh, klawhz)
- (4) Mah _____ an ni maang kuanz keu waiz. (maeoz, maeo)
- (5) Keuh lan pawiz seu taang _____ Saaoz. (Lawi, lawi)

4. 2 khaw cih seu thaeoz. Aez naeh ta 5 thaeoz.

(lak aalz, klaangz ta), (thaiz, sraakz), (meuk, peu nahz), (seu tuhz, kaaiz), (lek, yaerz)

5. Taemz lawng lan khahz wiun aez naeh ta 10 thaeoz.

Kaanz Sawnz (13) Kaam, Nyaan, Wiriyahz



Meuz diz maang kahz keu waiz tuhz omz rawng. Hawkz mus daz Kaam, hawkz samz mus daz Nyaan, thaengz hawkz samz mus daz Wiriyahz.

Kamz diz ihz khahz kahz keui kaw phraeoz truz, tang rup, tang wingz daehz. Kaam samz, “Cih seu naez kaw yum kaam kwaz, kaam te kawr boh ohz.” Ihz khahz kahz keu diz kaw a wa bawnz lae truz kahz an yum kaam ne. Ihz plawiz mok a naez kaw naeh a diz.

An naeh Nyaan diz kaw seuk cih daehz yam. Ihz khahz kahz keui awlz kaw, thaang kahz ne a wa yam rae, nam mok lawng mawh naehz, plawiz mok hnhz tawiz waar omz ne leun. Hnhz kaw plas z teuk dawtz kut meu rae tuh z omz ne tiunz lan.

Wiriyahz tae beuk awlz ihz khahz kahz phraeoz truz kaw, lan khahz moh tawiz omz truh. Yak aez ihz cawpz bawnz daehz ne, Wiriyahz seu tih mok toz daehz se se. Tahz kahz keui kaw nam bawnz thaengz kahz leui rae, keuh kaw weng, leh weng tang kahz an diz.


Kawp ceun diz eh z nam lo az koz kaam, kaam nam caang kawr eh z naehz. Eh z lo maang nyaan pi nya, lo maang wiriyahz se se caang kai awng myaang.

Seum Rih (13)

1A. Seum rih rawz boh seum rih taemz.

Kaam, nyaan, wiriyahz, rawng, waar, plasz, cawp

1B. Taemz lik tawiz raang.



2. Tawpz mony maanyz.

- (1) Tuhz a pum an ni, maang kahz naehz naehz?
- (2) Meuz tahz kahz keui phraeoz truz ne Wiriyahz cih seu naez?
- (3) Meuz tahz kahz keui phraeoz truz ne Nyaan cihz seu naez?
- (4) Meuz tahz kahz keui phraeoz truz ne Kaam cihz seu naez?
- (5) Ihz khahz kahz keui bawnz weng kahz an nae, kawp naehz?

3A. Ras sapz an tawz.

- (1) Seum panz kingz caak ne anz lo _____ mawh? (kwahz, kwah)
- (2) Reus peu nahz _____ ne daz seu naez? (ngwah, ngwahz)
- (3) Pehz lan pawiz anz _____. (pyaw, plaw)
- (4) Hnhz taw mak nim _____ lan. (phlaar, phraar)
- (5) Pehz sawnz lik anz rawhz _____ baaiz. (kreuk, kheuk)
- (6) Anz mih mawz _____ lotz? (tum, tumz)
- (7) Ihz moh lang _____ khyaw baaiz. (kaangz, kaang)

3B. Sapz khaw tawiz ti lawnz.

- (1) Pehz suamz _____ seu tuhz naehz?
- (2) Tiangz omz saakz _____.
- (3) Tatz khaehz seum _____, seum kaaiz lo khoz.
- (4) Tatz khaehz teuk _____, seum ploz lo lan.
- (5) Reu Yaang ehz lo teum _____.

4. Plut toz lik kheuz mawh tawiz ti an lo, sapz tang cakz deukz teur co (,) boh cakz deukz (.).

lo tiangz aez klawhz seu ngihz beuk nam bawnz tiangz omz phawmz kaw nam rak phawmz patz sunz ca teur ceus te kheuk toz daehz beuk bawnz tiangz omz kaw rawhz moh yoh moh ngang omz ne aez lawng moh rak aez lawng katz ngang daehz nahz klawhz ihz

5. Beuk maen meuz daehz tan, maang phawmz raany ceun nae? Raany khahz wiun haz? Raany khahz kahz haz? Raany tumz lotz haz? Raany khahz keulz kuanz bohaz haz? Taemz seu daehz mawz.

Kaanz Sawnz (14) Omz boh ngal



Omz ne naeh ti ihz peung. Beuk nam bawnz suamz kaaiz 7 seu ngihz, nam yam. Beuk nam bawnz tiangz omz 3 seu ngihz tae nam khaam bawnz. Ti nam maang omz ne yaeh kaw nam sunz moh. Ngaz deungz seu tuhz, deungz kaaiz, beuk nam maang omz kaw nam caang deungz. Ihz ehz ne beuk daz nam bawnz tiangz omz, nam bawnz humz omz saakz saakz tae nam moh rak, nam maang keum rang naehz. Kawp daz omz ne naeh ti ihz ehz peung.

Yaeh se nam daz nap suamz omz rae lo cao rak rak. Beuk nam nap suamz, keulz ka penz, humz ka penz tae penz sraangz khamz keui, reum keui. Waaiz keulz reu sraangz yeung lae boh nuar truz thaz kawcz ne nam rak tiangz omz luat, keulz omz luat. Phreumz reu, reu ne a wa phre caang tiangz, caang humz.

Ngal kaw naeh meoz ihz ehz cao laai. Kiarz katz, beuk nam bawnz tatz ngal nam moh bawnz. Deungz seu tuhz, kaaiz, beuk nam maang ngal kaw nam caang. Ngal ne naeh ihz bawnz peung mok klawhz seu ngihz. Keuiz daz yak mok woi hnhz laz laz. Beuk nam nap suamz hnhz, caang kat kang, kat pruh. Kawp ceun diz omz boh ngal ne beuk mawz cao kaw penz an rak, beuk nam mawz cao kaw penz reung dengz kawcz phawmz, caang teuk luh tang phawmz ihz.

Seum Rih (14)




1. Seum rih rawz boh seum rih taemz.
sraangz khamz, kawcz, phreumz reu, kiarz katz, woi, kat pruh

- 2A. Tawpz anz boh nam.
 - (1) Beuk nam bawnz suamz kaaiz 7 seu ngihz, nam yam. _____
 - (2) Kawp daz omz ne nam anz ti ihz ehz peung. _____
 - (3) Yaeh se nam daz nap suamz omz rae lo cao rak rak. _____
 - (4) Kawp ceun diz omz boh ngal ne beuk mawz cao kaw penz an rak. _____
 - (5) Ngäl ne naeh ti ihz ehz peung. _____

- 2B. Tawpz mony maanyz.
 - (1) Omz ne lo ta ihz ehz nahz ceun nae?
 - (2) Nam tiangz omz moh bawnz seu naeh seu ngihz?
 - (3) Lo humz omz meuz ceun nae ne?
 - (4) Aez seu eumz tuh z kiarz katz ne lo naehz?
 - (5) Ngäl ne cao bawnz ceun nae?
 - (6) Kawp naehz lo mawz cao ngäl ne rak rak a?

- 3A. Taemz teuk neuk toz lik.
 - (1) Thaz reu k _____
 - (2) _____hz keu teh z
 - (3) Aakz p_____
 - (4) S_____muny
 - (5) Seu tuh z l_____ng_____

3B. Sapz teun khinz klawngz klaengz.



4. Sapz cakz deukz teur co (,) cakz deukz (.) boh khaw lawk khaw dapz (“___”).

ihz cih maar cih sraakz keui lo cih mok khrengz beuk nam maang khrengz ngaz cih seu naez moh hoh maang khrengz maar tae pao yoh cung klaez kaw moh eupz ihz maar yaan keui teur ka kaw nam weng leui moh tawiz khrengz maar tang wit sraakz maar waaiz cang kai weng meuz keuh moh khrengz maar meuk peu nahz kaw peuk khawk a diz yaerz kaw keuh plawiz tawiz rim khrengz maar ihz teur ka kaw moh khreng tang wit

5. Teamz lawng daehz khaenz meuk, peu nahz seu mawz taemz.

Kaanz Sawnz (15) Kaaiz Nyaak



Thungz kuanz mai Reu Yaang keui, beuk naeh kiarz leun kamz, ihz keui khahz cih suamz kaaiz nyaak.

Beuk ngaz cih kaaiz nyaak ne phrihz phrahz an lo cao keui samz;

1. Kaaiz nyeuk
2. Klohz hungz
3. Reung hungz
4. Palz
5. Raehz
6. Omz
7. Suakz
8. Lak ngah keu ni.

Beuk ngaz cih kaaiz nyaak, leh kohz kaaiz nyeuk kraao seu daehz aanz cih. Leh omz haaaz aez raamz laep. Tamz mok kraao aarz na ri, aez kohz ne bukz bukz. Beukz sapz omz tuhz klohz hungz kraao seu khinz, leh kohz an tamz mok an diz, paakz sapz tuhz reung hungz. Beuk a wa kaw dohz sapz kaai klohz hungz boh.

Kamz ni samz keul daakz mok lak ngah rae tuz teuk phangz mok tang hnhz. Sapz tang suakz aez taan to. Meuz maat sapz kaaiz nyeuk ne leh lak ngah thukz mok teuk aacz tuhz palz ne, caang kai sapz kaaiz nyeuk hungz. Tuz aez teur kut daehz aez ducz ducz, hawkz tahz tuz, hawkz tahz seuk weur. Beuk a wa ducz kaw a wa penz kaaiz nyaak. A wa naeh kaaiz nyaak Reu Yaang an raang priangz.

Kaaiz nyaak daz ne naeh seum suamz seu meoz, an ihz raamz heungz keui makz, laai cih kaw nam kreuk. Meuz daehz lan khahz keulz mah thao, paz thao, kuanz mai, kuanz boh kaw leh kaaiz nyaak an diz khahz teur tawrz aez daehz nahz.

Seum Rih (15)

1. Seum rih rawz boh seum rih taemz.

kaaiz nyaak, kaaiz nyeuk, klohz hungz, reung hungz, ducz, palz, raehz

2A. Tawpz anz boh nam.

(1) Kiarz leun kamz ne kuanz mai Reu Yaang keui cih kaaiz nyaak. _____

(2) Ihz cih kaaiz nyaak sapz lak ngah imz. _____

(3) Sapz omz tuhz klohz hungz ne seu khinz. _____

(4) Beuk tuz kaaiz nyaak yak tuz aez ducz. _____

(5) Meuz tuz lak ngah ne sapz tang suakz taan taan. _____

2B. Tawpz mony maanyz.

(1) Ihz cih kaaiz nyaak leh naehz cih?

(2) Taemz phrihz phrahz an lo cih kaaiz nyaak.

(3) Tamz kaaiz nyeuk seu naeh na ri?

(4) Lak ngah ne bawnz cih seu naez?

(5) Meuz kraao an nae ne tuz kaaiz nyaak?

(6) Cih seu naez tuz kaaiz nyaak?

3A. Ras toz lik sapz tawiz ti lawnz.

(1) Ras sapz mah lik aez penz khaw. (m, k, h, s, r)

Mony _eu ma ihz thao boh ihz _aang reung dengz _as keui lao _eumz
mok _uanz pliz, _uanz laanz keui nahz _eungz baaiz.




(2) Ras sapz kuanz lik aez penz khaw. (a, aa, e, u, eu)

B__k makz i d_tz lang boh y__ m_hz kaw caang p_nz ihz thengz m__t.

(3) Ras sapz reus lik aez penz khaw. (h, z, hz)

Seum suam_ tang meo_ an nae_ ya ma__ keu ni baaiz leu_ boh.

3B. Sapz teun khinz klawngz klaengz.




4. Sapz cakz deukz teur co (,) cakz deukz (.) boh khaw lawk khaw dapz (“___”).

Mony reu ma ihz thao boh ihz maang reung dengz mas keui lao seumz mok kuanz pliz kuanz laanz keui nahz heungz baaliz Yak seum rih lahz seu likz yak bumz plu yak tiangz keu daaoz yak suamz ya mahz yak su i dutz lang yak kaoz kuanz yah ihz yak khahz taw phaaiz yak khahz raen ihz meukz keu ni

5. Taemz lawng meuz ihz kaang daehz cih suamz kaaiz nyaak. Yaeh cih, yaeh kawr, samz cih seu naez suamz? Taemz seu daehz mawz.

Kaanz Sawnz (16) Laai damz lek



Teu Mang sunz damz lek baaiz. Keuiz daz hnhz nam mawz damz. Hnhz lan maanyz paz dengz. Paz dengz keuh kaw lao plaez hnhz nahz an lo keui. Hnhz kaw cih tawiz ceun paz dengz daehz lao.

Meuz seun teungz hnhz ngaz cih khawk. Hnhz khahz tatz aacz keun rang, tatz truz keun rang timz laem. Yoz, paez, seun dohz keui kaw tatz truz. Kamz ni hnhz truz peuk ceukz kaang lek daehz. A wa teuk eupz samz nam maang seum paelz boh seum khangz. Hnhz kaw lan maanyz thaengz paz dengz daehz.

Paz dengz keuh lao hnhz, “Anz mih eunz a wa maang seum khangz boh seum paelz?” Hnhz kaw daz daehz eunz maat maang. Paz dengz keuh cao hnhz khahz tatz thaengz boh. Hnhz kaw khahz tatz khaehz theungz cih seum paelz boh seum khangz. Hnhz kaw weng cih teuk wa khawk lek daehz.

Meuz a wa hacz aamz ne hnhz lan lao thaengz paz dengz daehz. Paz dengz aacz lan hnhz khahz yal kuanz laep cih ceu, an peun praasz buhz. Kaar kuanz paz dengz klamz weng truz ihz teun hawkz.

Truz plawiz sapz tuhaz khawk ne. Kamz diz haangz leh samz maat maang. Paz dengz keuh cao hnhz cih haangz lek. Teu Mang kaw teunyz khaehz truhz cih haangz. Paz dengz keuh lao plaez hnhz nahz laai damz. Hnhz kaw cih tawiz, lek hnhz keui yoh mawh baaiz. Nam paw bawnz damz ceu nawhz thanz paw bawnz saz.

Seum Rih (16)

1 Seum rih rawz boh seum rih taemz.

paz dengz, khawk, keun rang, yoz, paez, seun dohz, seum paelz, seum khangz

2A. Ras sapz an tawz.

(1) Teu Mang tatz truz keun rang _____. (tahz laem, timz laem, seu kawlz laem)

(2) Hnhz kaw lan tatz _____ cih seum paelz boh seum khangz. (khaehz peur lawng, khaehz theungz, khaeh pi yahz)

(3) Kaar kuanz paz dengz klamz truz ihz teun _____. (hawkz, keu aarz, keu wiaz)

(4) Waaiz a wa sapz lek ne paz dengz keuh cao hnhz cih _____ lek. (haangz, kaang, seum plaelz)

(5) Hnhz kaw cih tawiz, lek hnhz kaw yoh _____ baaiz. (kyehz, mawh, thao)

2B. Tawpz mony maanyz.

(1) Teu Mang nam mawz damz lek rae hnhz lan maanyz yaeh?

(2) Teu Mang seun teungz cih aacz naehz?

(3) Teu Mang lan tatz truz keun rang seu naeh laem?

(4) Teu Mang kaar kuanz deng yal truz lek ceun nae?

(5) Teu Mang leh khaehz naehz cih haangz lek?

3A. Ras sapz an tawz.

(1) Keuh mawz mony _____ baaiz. (keunyz, kuenyz, keungz)

(2) Pruh Rang _____ naeh teun khinz ihz. (saelz, Saerz, Saelz)

(3) Ihz Waan _____ truz keulz ehz. (Kluanz, Klunz, Klonz)

(4) I Naang tuz mak _____. (prit, brit, plit)

(5) Ihz kaang keuh naeh _____. (tualz, Tualz, tuarz)

3B. Leh toz lik tuhز lawkz cih aez penz khaw.

k	aw	ng	z
kh	o	k	h
ng	aa	n	hz

(1) _____

(2) _____

(3) _____

4. Leh khaw lik keu ni cih aez penz thaeoz. (hnhz, ohz, lan, nam, moh, pruh Omz Tuhz)

Pung taek; Hnhz moh pruh Omz Tuhz.

(1) _____.

(2) _____.

(3) _____.

(4) _____.

(5) _____.

5. Taemz lawng ihz lan pawiz keu thingz, tuhз pawiz ne maang naehz naehz. Taemz seu daehz mawz.

Kaanz Sawnz (17) Koiz laac



Meuz diz neungz maang simz, khrawmz boh koiz. Keuh keu waiz naeh kuanz boh. Keuh moh teungz khaehz kawmz. Simz kai baaiz hnhz cih mok haanz daehz kaai khaehz ne. khrawmz kaw cih daehz nahz haanz ceun simz ne. keuz daz koiz samz laac baaiz, hnhz nam khahz cih kaang.

Meuz seuk ngih ne keuh kuanz boh keu waiz keulz teur kawmz. Beuk prih a wa bimz, khrawmz boh simz kut yaetz tuh z kaang daehz. Keuz daz koiz samz nam maang daehz nahz kaang rae yaetz tawiz kaakz khaehz. Meuz teuk ngup ne simz boh khrawmz cao koiz cih kaang daehz. Keuz daz hnhz laac baaiz rae nam cih.

Meuz kiarz kawcz ne koiz moh tawiz kaakz khaehz. Meuz kiarz cung, koiz nam maang daehz nahz kaang rae cung nyaakz. Keuz daz meuz a wa phraez kiarz katz ne hnhz nam maang ti moh leui. Kawp daz katz baaiz. Simz boh khrawmz samz kut moh tuh z kaang daehz.

Meuz teuk bimz ne koiz katz baaiz. Toz hnhz paw kuangz, hnhz maanyz cih khaekz kuanz boh hnhz kaw kaar nam aez. Hnhz kaw wonz daehz daz, “Kap siz tae ohz cih penz penz kwaz,” da. Keuz daz meuz seu ngihz lae ne hnhz daz mial daehz, “Seum wawh nam tang yam lawh,” daz ceun ni. Meuz teuk bimz ne wonz seu meoz, seuk ngih samz daz seu meoz. Ihz laac naeh ceun koiz ne nam maang daehz nahz kaang seu pawk.

Seum Rih (17)

1. Seum rih rawz boh seum rih taemz.

Koiz, laac, khrawmz, kaakz, teuk ngup, kiarz kawcz, nyaakz, kiarz katz

2A. Tawpz anz boh nam.

(1) Maang simz, khrawmz boh koiz, keuh keu waiz nam teur maen. _____

(2) Meuz seuk ngih ne keuh kuanz bohz keu waiz keulz teur kawm. _____

(3) Koiz kaw cih daehz nahz kaang kaai teungz khaehz. _____

(4) Meuz kiarz cung koiz nam maang kaang rae cung nyaakz. _____

(5) Meuz phraeoz kiarz katz ne, koiz maang boh ti moh. _____

2B. Tawpz mony maanyz.

(1) Simz, khrawmz boh koiz, keuh moh a naez?

(2) Simz boh khrawmz kaar naeh seu naez?

(3) Simz boh khrawmz cao koiz cih naehz?

(4) Koiz ne naeh ceun nae?

(5) Meuz teuk bimz ne koiz daz ngaz cih kaang, phraeoz teuk ngup hnhz daz seu naez?

3A. Ras sapz an tawz.

(1) Yak seum rih seum _____ nam rak. (suam, sawmz, suamz)




(2) Beuk nam mawz lik, lan prih ihz _____ baaiz. (khreuk, kreuk, kleuk)

(3) Anz mih makz _____? (braang, praang, plaang)

(4) _____ ta waet tawiz toz yam. (Klaangz, klaangz, klaang)


(5) Simz _____ keui moh tawiz kaang. (sriapz, sriap, sliapz)

3B. Sapz teun khinz klawngz klaengz.



4. Ras sapz khaw maanyz '?' boh khaw lao '.'
- (1) Suamz kaaiz seu tuhz maai
 - (2) Suamz kaaiz seu tuhz naehz
 - (3) Keuh ngaz lo thaz tui omz
 - (4) Mai ehz lan teur laas
 - (5) Anz moh rak
5. Taemz mus plaehz khaehz 15 meoz.

Kaanz Sawnz (18) Reu ingz



Lawng cih reu ingz ne, a yez mawh baaiz ta ihz ehz nahz. Beuk nam maang reu ingz sunz yangz a naez kaw yangz. Meuz daehz yangz a naez se nam daz, ihz kaw yangz puatz daehz, daehz kaw yangz puatz ihz. Beuk yangz lang kaang, yangz woi, beuk naeh ceun diz, roi samz truz cu. Samz lan cu thaengz seu tuhz kaaiz daehz.

Kawp daz Reu Yaang ehz nam maang reu ingz rae ihz penz, ihz reum keui heungz baaiz. Klungz suhz, klungz kak, yawz ka yangz hawlz caang yam ihz keui. Beuk penz yawz ka khahz seuk neum kaw hacz paekz heungz baaiz. Yak aez roi caang cu seu tuhz kaaiz ne, lo cih reu ingz laep laep.

Mony Reu Yaang ehz kaw daz mok, sunz num ngaai lang, sunz yangz ngaai bimz daz mok ne tawz baaiz. Temz keur meh keun yah, temz ihz thao ihz plung, meuz khahz yangz ne kawp nam tan mas ihz truz thaz naez rae caang bawnz reung dengz keu sehzh ihz. Yak aez ihz bawnz daz daehz, “Sunz yangz taamz khahz tuhzh.”

Beuk a wa lan reu ingz, lo khez tihz daehz caangz caangz. Beuk nam khez tihz caangz caangz, meuz daehz khahz cawpz leh seum suamz, caang penz yawz ka klawhz meoz. Tuhz reu ingz kaw lo haaoz se se. Lo tang seu pya khez tihz, an mah phrihz keui yam. Kawp ceun diz rae, reu ingz an daz ne, lo maang klawhz kaang, lo yangz tawiz reu ingz klawhz ihz.

Seum Rih (18)

1. Seum rih rawz boh seum rih taemz.
reu ingz, klungz, mony, seu pya, khez, yangz, laep, keu sehz

- 2A. Tawpz anz boh nam.
 - (1) Beuk nam maang reu ingz lo yangz a naez kaw yangz. _____
 - (2) Beuk penz yaw ka khahz seuk neum kaw nam hacz paekz. _____
 - (3) Beuk penz yawz ka yangz hawlz kaw caang yam. _____
 - (4) Beuk sunz num ngaai lang sunz yangz ngaai bimz. _____
 - (5) Beuk a wa lan reu ingz nam lo khez tihz. _____

- 2B. Tawpz mony maanyz.
 - (1) Kawp naehz lo maang reu ingz klawhz kaang a?
 - (2) Beuk yangz woi, caang penz yawz ka naehz?
 - (3) Kawp naehz lo cao reu ingz a?
 - (4) Beuk penz yawz ka maang reung dengz kreuk ceun nae?
 - (5) Lo mok reu ingz daehz ceun nae?

- 3A. Ras sapz an tawz.
 - (1) Yah Maaiz _____ paaiz tuhz maar. (dawkz, tawk, tawkz)
 - (2) Law li lan taangz _____. (macz, maacz, mac)
 - (3) Tuhz sraakz ehz maang teungz _____ keu aarz. (khaehz, khaeh, kaehz)
 - (4) Mak reungz kaai rang teuk _____ cur. (luar, luarz, lualz)
 - (5) Yak prawk peur lah ihz mawh. (prawk, prawkz, plawk)

- 3B. Taemz teuk neuk toz lik.
 - (1) L_____ sawtz
 - (2) Sroz ____ tuhz
 - (3) Sroz _____ awmz
 - (4) P_____ huhz
 - (5) Seun _____ khaehz

4. Sapz cakz deukz teur co (,) cakz deukz (.) boh khaw lawk khaw dapz (“_____”).

teu kraz naeh ihz pruh omz tuhz hnhz cih suamz kaanz sraakz maar kaar tahz yah maang kuanz keur meh hawkz boh kuanz keun nyah hawkz mus kuanz kaar daz naaoz thunz boh naang eurz naaoz thunz moh cawngz tuhz weng paang longz naang eurz samz moh cawngz tuhz weng omz plaeh kaar kuanz mai sawnz lik meu raan lik enkret boh lik khaez beuk keuh awng thaengz kaw paz keuh ngaz phuhz kaar lan sawnz prih kya paan

5. Taemz lawng peuk seumz kaw khaez. Seun teungz plihz taw weng phraeoz kaang, bawnz cih naehz naehz? Ceu nawhz seu naeh? Bawnz lum la aez hnhz nahz ceun nae? Taemz seu daehz mawz.

Kaanz Sawnz (19) Peuk seumz khaehz



Maang ihz tahz yah keu aarz, kaar moh a pruh, patz keun bongz prih Khaez. Pruh keuh omz kinz baaiz. Bawnz khahz beukz omz yaan baaiz. Beuk daz nam maang tho, nam maang law li taangz omz kaw kreuk baaiz. Pruh keuh naeh orz plaangz klaacz nam maang teungz khaehz naehz. Plaangz klaacz an diz waas baaiz.

Kaar tahz yah wonz daz, “Kawp nam maang teungz khaehz naehz rae omz kinz baaiz. Aaiz tahz yah peuk seumz khaehz ne rak doz.” Kamz diz kaar tahz yah teum prawm peuk seumz khaehz. Ihz pruh keui thaang kaar tahz yah a wa reu waet. Meuz seun teungz kaar peuk seumz aacz tawiz orz plaangz klaacz. Kaar leh tho daehz taangz truz omz, swoiz klawhz seu ngihz, teur seu ngihz waiz laehz.

An kaar tahz yah peuk seumz ne waas nyaao nyaao. Kaar tahz yah reu baaiz. Beuk teungz khaehz ne a wa mawh kaw kaar nam beukz swoiz leui. Kaar peuk seumz lan lan klawhz wit. Waaiz kaar peuk seumz, moh seu kawlz hanz wit ne khaehz an kaar seun teungz peuk seumz ne a wa mawh baaiz. An yam kaw maang boh keuz daz an yam ne lany.

Seu ni ihz nam yaak daz kaar reu waet leui. Kawp daz orz plaangz klaacz rim pruh keuh ne a wa penz ruk khaehz. Kawngz omz lu tuhz pruh keuh kaw a wa lae. Meuz aacz an diz kawngz omz lu kaw nam lae omz. Seu ni ihz pruh keuh kaw cih kawr kaar tahz yah. Ihz pruh keuh kaw pyaw baaiz.

Seum Rih (19)

1. Seum rih rawz boh seum rih taemz.

orz, plaangz klaacz, kinz, teum prawm, reu waet, swoiz, nyaaoo nyaaoo,
lany

2A. Tawpz anz boh nam.

(1) Maang ihz tahz yah keu aarz, kaar moh patz seun daalz prih Khaez.

(2) Pruh keuh omz leung baaiz. _____

(3) Kaar tahz yah teum prawm peuk seumz khaehz. _____

(4) Waaiz kaar peuk seumz, moh seu kawlz aarz wit ne khaehz keui a wa
mawh baaiz. _____

(5) Waaiz an diz ihz pruh keuh kaw cih kawr kaar tahz yah, keuh kaw pyaw
baaiz. _____

2B. Tawpz mony maanyz.

(1) Ihz tahz yah kaar diz moh a naez?

(2) Ti keuh moh ne naeh ceun nae?

(3) Kaar tahz yah wonz seu naez?

(4) Kaar tahz yah bawnz lum la teungz khaehz keui ceun nae?

(5) Waaiz seu kawlz hanz wit ne, naeh truz ceun nae?

3A. Ras sapz an tawz.

(1) Keuh _____ mah lan maar. (kuan, kuang, kuanz)

(2) Keuh lan _____ Longz. (paang, Paang, paan)

(3) Keuh bawnz ngohz kaaiz _____ baaiz. (heunyz, heunz, heungz)

(4) Keuh tumz tho lan _____ omz. (beuk, peuk, beukz)

(5) Keuh lan suamz _____ prih Thaiz. (caang, cangz, caangz)

3B. Taemz teuk neuk toz lik.

(1) t___ yaakz

(2) m___ rang

(3) kl_____ klapz

(4) m___ kaang

(5) k___ tasz

4. Sapz cakz deukz teur co (,) cakz deukz (.) boh khaw lawk khaw dapz (“___”).

keuh naeh ihz pruh kaang tong keuh khahz kawngz pawngz tawiz waar omz mawh beuk naeh kiarz hawngz keuh khahz kawngz se se klawhz wit teur ka kaw lo thaz reu keutz omz lan kawngz sraakz ihz pruh ruakz lang tawiz sraakz creng keui teur ka kaw seutz cakz ngeh tawiz ti omz daelz i muz kaar i rong tae nam lan kaar cih ihz pao kaang teur deuiz piz piz phraeoz phraeoz tawiz teun leukz kaar khahz saz seu tuhz lahz ngiar tuhz weng omz plaeh weng truz laz baaiz rae nam treupz ihz kap siz ne kaar aanz lan tawiz ihz

5. Taemz lawng an naeh tuhz phawmz daehz. Reung dengz khyaw, seuz phawmz, sunz ca, doz, sunz lan, coh, suamz saakz keu ni. Meuz naeh ne naeh ceun diz. Taemz seu seu kawlz thaeoz.

Kaanz Sawnz (20) Waap phawmz wot



Meuz diz neungz klaangz boh lek teur cih kuanz boh rak daehz. Waaiz an diz klaangz moh kaai teungz khaehz. Hnhz cih haanz maang kuanz kaai teungz khaehz. Lek kaw maang kuanz, cih tuh z teungz khaehz ne moh.

Naeh seu seu ngihz meuz phangz teuk ngup cao ne, waap phawmz wot datz lan tawz rim kuanz lek an diz, hnhz kaw wonz daz, “Aw, klaangz maang kuanz kaai khaehz, lek kaw maang kuanz tawz teungz khaehz. Ohz ngaz cih seu naez ez, aez bawnz suamz kuanz kaar a?”

Naeh seu seu ngihz, hnhz raw lao klaangz an diz daz, “Eu! Mih maang haanz lang khaehz, lek kaw pawt tuh z, aacz moh kuanz daehz teungz khaehz mih moh ne. Hnhz cih aez khaehz ne taz, hnhz sunz suamz kuanz mih eu.” A wa daz ceun diz ne samz lan cu lao lek ne boh, daz lek ne nahz, “Mih cih ti moh kuanz daehz teungz khaehz klaangz moh. Beuk maen meuz mih nam naeh ne, klaangz ngaz leh suamz kuanz mih eu.

Klaangz boh lek kaw phawmz nam rak leui. Wonz ta kuanz daehz klawhz an nae, klaangz kaw doz lek, lek kaw doz klaangz. Lek nam yaak lan khahz damz kuanz daehz leui. Klaangz kaw nam yaak tang daehz.

Kuanz lek keui yam seu ngihz teun hawkz. Kuanz klaangz kaw yam seu ngihz teun hawkz. Bawnz leh thengz kuanz yam ne. Leh waap phawmz wot an diz suamz saakz daehz nahz. Eh z kaw naeh ceun diz laai, nam lo yum ihz upz suamz daehz.

Seum Rih (20)

1. Seum rih rawz boh seum rih taemz.

waap, klaangz, haanz, teuk ngup, phawmz wot, datz, pawt, aacz

2A. Tawpz anz boh nam.

(1) Meuz diz neungz klaangz boh waap teur cih kuanz boh rak daehz.

(2) Klaangz kuanz mah moh kaai teungz khaehz. Lek kuanz mah samz cih tuh teungz khaehz. _____

(3) Waap ne coh kuanz kaar rae, truz upz suamz. _____

(4) Waap an diz lan cu lek rae daz, "Beuk mih nam naeh ne, klaangz ngaz leh suamz kuanz mih eu." _____

(5) Kuanz kaar yam seu ngihz kawmz. _____

2B. Tawpz mony maanyz.

(1) Yaeh teur cih kuanz boh rak daehz?

(2) Klaangz moh a naez? Lek samz moh a naez?

(3) Waap cih seu naez aez daehz bawnz suamz kuanz kaar?

(4) Kuanz klaangz boh kuanz lek keui naeh lan ceun nae?

(5) Tuhz a pum an ni, ehz bawnz sawnz leh naehz?

3A. Ras sapz kuanz seuk rah tawiz ti lawnz. (ai, aai, ao, aao, awi, aeo)

(1) ___z Longz lan prih Khaez.

(2) Kuanz keur meh hnhz a wa penz seu n___z mawh.

(3) Keuh kuanz m___ moh ihz teur pruh.

(4) Lo teuk ngarz mony reu ma ihz th___.

(5) Lo cih t___z an rak.

(6) Meu ni pehz ngaz lan ___z naez.

(7) Mih lan phr___z a naez.

3B. Ras sapz an tawz.

(1) Kuanz ihz keui a wa weng _____. (truz, kruz, cruz)

(2) Ihz ___ naeh ihz teuk. (meuk, meukz, mokz)

(3) Keuh lan teur ____ Omz Plaeh. (las, laas, laasz)

(4) Ihz cih _____ cah, ihz cih daehz yeung. (taehz, daehz, daeh)

(5) Hnhz taanyz _____. (talz, tarz, darz)

4. Sapz cakz deukz teur co (,) cakz deukz (.) boh khaw lawk khaw dapz (“_____”).

pruh omz tuhz boh weng omz plaeh teur yaan naeh seu tualz lakz ihz omz tuhz keui rop lan omz plaeh klawhz seu ngihz beuk tumz tho tumz law li reung dengz wot baaiz bawnz wor lan thaz pruh omz lu kaaiz keu sen kuanz ihz plung omz tuhz keui tumz lotz kyahz baaiz kuanz mai reu yaang aarz diz keui nam tawhz rany keuh thaz keun bonz pruh keuh maang pruh rang saelz thaz reu lae samz naeh pruh ruk lahz thaz reu keutz naeh pruh kaang tong thaz seun daalz samz maang pruh ta saaiz naam paat saam naam paat sawng keu ni beuk keuh lan omz plaeh kaw bawnz datz lan pruh naam paat sawng

5. Taemz lawng an daehz yaetz reu muh awlz. Taemz aez naeh seu seu kawlz thaeoz.

Kaanz Sawnz (21) Taanyz Yol raas



Teu Uz naeh kuanz Reu Yaang. Hnhz moh tuhz pruh Reu Yaang. Hnhz naeh ihz reum buz. Hnhz sunz mawz taanyz yol raas, keuz daz hnhz nam mawz taanyz. Hnhz lan maanyz ihz thao hawkz an moh tuhz pruh ne. Ihz thao an diz kaw mok phawmz hanz hanz lao plaeh hnhz nahz.

“Meuz seun teungz siakz aacz khaalz, siakz tawiz klawk. Beuk reungz pawngz patz kaw lo siakz ponz pawngz, pawngz hanz kaw lo siakz seu waiz pawngz kaw bawnz boh. Siakz khaalz reungz seu taw ne bawnz boh yol raas teun akz. Khaalz keu diz kaw kuasz tawiz klawhz senz. Siakz aez kuangz lak khaalz mat phrihz phrahz. Kam daehz dawhz yol mawh, yol kyehz, khaalz kaw teur lan. Ruap khaalz plaakz hanz ku, taanyz san khatz aacz titz. Beuk a wa kaw wor penz seu dukz, taanyz phrawz ngaai.

Beuk a wa samz taanyz phraez khaalz, beuk a wa maen kaw wiat waar, taanyz piangz ploiz boh. Beuk a wa taanyz piangz ploiz kaw saetz thengz khaalz leuz teuk krenz, teuk krenz. Kamz ni a wa bawnz yol raas kuanz mai Reu Yaang hawkz laep baaiz. Sappz phrihz phrahz an daehz lo cao keui kaw a wa bawnz.”

Teu Uz kaw seuz baaiz hnhz kaw weng taanyz yawt daehz lang kaang keuh ne. Meuz seun teungz tae nam paw laep. Keui daz hnhz nam klaez phawmz, taanyz tikz tikz, yeung moh yeung laep truz. Seu ni hnhz a wa mawz taanyz keunyz baaiz. Saatz, keu tel, meu nawz, sang taepz, teur na, piarz, tarz, pheunz, reung hungz, seum kriung, piat, taen ngohz, seur leung saan laai keu ni.

Seum Rih (21)

1. Seum rih rawz boh seum rih taemz.
yol raas, taanyz, khlaalz, piangz ploiz, keu tel, meu nawz, teur na, piarz,
tarz

- 2A. Ras sapz an tawz.
 - (1) Hnhz lan maanyz ihz thao _____. (keu aarz, keu waiz, hawkz)
 - (2) Beuk reungz pawngz patz kaw lo siakz _____. (hanz pawngz, ponz pawngz, tualz pawngz)
 - (3) Beuk pawngz hanz kaw siakz _____. (seu pawngz, aarz pawng, waiz pawngz)
 - (4) Ruap khaalz plaakz _____. (tualz ku, hanz ku, ponz ku)
 - (5) Kamz ni a wa bawnz yol _____ kuanz mai Reu Yaang hawkz laep baaiz.
(ras, raas, raac)

- 2B. Tawpz many maanyz.
 - (1) Teu Uz naeh ihz sunz mawz naehz?
 - (2) Meuz seun teungz taanyz yol raas ne sapz khaalz teur naeh senz?
 - (3) Yol raas ihz lo seum sapz naehz?
 - (4) Teu Uz naeh ihz phawmz seu naez?
 - (5) Anz hnhz mawz taanyz keunyz?

- 3A. Ras sapz an tawz.
 - (1) Reu Yaang meuz neungz hukz haanz, _____ lang. (rangz, raang, raangz)
 - (2) Hnhz longz reung dengz, bawnz _____ yum. (klurz, khlorz, khlulz)
 - (3) Yah Mon tawkz lahz seum _____. (buarz, puarz, bualz)
 - (4) Rus makz _____ seu neum. (tis, tisz, disz)
 - (5) Reu yung kruhz seum wawhz, kaang rawhz _____ baaiz. (klas, kras, cras)

3B. Taemz teuk neuk toz lik.

(1) Nyang teur ____ klohz

(2) Taaiz _____ nuang

(3) H_____z yah

(4) Maengz k_____ ngawz

(5) Peur _____z

4. Leh khaw lik keu ni cih aez penz thaeoz. (anz, ihz, naeh, mih, suamz, a naez, naehz, hnhz)

Pung taek; Mih suamz naehz?

5. Taemz lawng kez cuz mah paz daehz, aez naeh seu seu kawlz thaeoz.

Kaanz Sawnz (22) Ihz damz pæhz



Meuz diz neungz maang ihz damz pæhz hawkz, hnhz botz tang pæhz daehz lae reung dengz. Samz maang ihz meukz keu waiz teur lao mok daehz pao reung dengz hnhz, aez daehz bawnz maat pæhz hnhz ne.

Keuh keu waiz pao ihz teur ti. Meuz ihz damz pæhz phraeoz truz tawz keuh ne, hawkz plocz lae truz daz hnhz nahz, “Cih naehz lah, mih caang daz botz tang sohz a.” Hnhz kaw daz, “Nam anz sohz lawh, naeh pæhz eu.” Daz ceun diz kaw peun lan.

Thaengz hawkz samz plocz lae truz thaengz, daz hnhz nahz, “Ez mai, caang daz botz tang sohz raoz ceun diz lah.” Phawmz hnhz kaw a wa pleung rae daz, “Ohz botz pæhz caang daz ohz eunz naeh sohz raoz ceun ni lah.”

Hnhz kaw peun lan thaengz nyaenz, ihz hawkz an pao thaz puatz ihz ne plocz lae truz daz hnhz nahz, “Cih naehz lah mai, caang daz botz tang sohz raoz ceun diz a? Nam teur kiungz tang mai ehz hawkz hawkz.”

Phawmz hnhz kaw a wa luh baaiz rae daz, “Cih naehz lah, ihz keu waiz keu ni caang daz ohz botz sohz raoz ceun ni a? Ohz eunz naeh sohz raoz mawn haz?” Daz ceun diz rae aez keuh nahz pæhz daehz ne. Keuh keu waiz kaw a wa bawnz daehz nahz pæhz hnhz.

Ihz ehz kaw naeh ceun ihz damz pæhz, sumz pæhz daehz ne. Beuk daz daehz nam mok phawmz yum klakz klakz an ti daehz yum ne caang cih aez daehz sumz ceun diz laai.

Seum Rih (22)

1. Seum rih rawz boh seum rih taemz.
paehz, teur lao, phawmz, pleung, plocz, sohz raoz, kiungz, thaz puatz
ihz, klakz

- 2A. Sapz khaw tawiz ti lawnz. (sohz raoz, pleung, teur lao, plocz, kiungz)
 - (1) Maang ihz meukz keu waiz _____ mok daehz pao reung dengz hnhz.
 - (2) Hawkz _____ lae truz daz hnhz nahz, “Cih naehz lah mai, caang daz botz tang sohz a?”
 - (3) “Ez mai, caang daz botz tang _____ ceun diz lah.”
 - (4) Phawmz hnhz kaw a wa _____ rae daz, “Ohz botz paehz caang daz ohz eunz naeh _____ ceun ni lah?”
 - (5) Nam teur _____ tang mai ehz hawkz hawkz.

- 2B. Tawpz mony maanyz.
 - (1) Ihz meukz keu waiz teur lao mok daehz, ngaz cih seu naez?
 - (2) Meuz ihz damz paehz botz truz paehz ne, ihz hawkz an diz daz hnhz botz naehz?
 - (3) Meuz ihz keu waiz daz paehz hnhz naeh sohz raoz ne, tuh phawmz hnhz naeh seu naez?
 - (4) Anz ihz meukz keu diz bawnz paehz ihz damz paehz?
 - (5) Yawt tuh a pum an ni, ehz cih kaanz seu meoz meoz, beuk ihz saehz daehz eunz kaw ehz ngaz cih seu naez?

- 3A. Ras sapz aez maen ti daehz. (phawmz, aacz, wiar, plawmz, ngarz)
 - (1) Lo _____ seum suamz nam rak.
 - (2) Teuk _____ mony reu ma ihz thao.
 - (3) Reu Yaang lo khatz _____ cih kaanz.
 - (4) Yak cih ihz _____, yak dawmz khangz ihz.
 - (5) Ihz keu daehz keu daepz ehz, _____ cih mok.

3B. Leh toz lik tuh lawkz cih aez penz khaw.


c	eu	s	z
s	ua	k	h
ny	ia	m	hz

4. Sapz cakz deukz teur co (,) cakz deukz (.) boh khaw lawk khaw dapz (“___”).

mus hnhz daz naang saz lu hnhz naeh ihz ta saaiz thaz seun daalz omz hnhz naeh ihz mawz keun euiz ihz kaang keuh naeh khanz mus tahz hnhz daz teu kya mus mah paz hnhz daz tahz lu boh waai rong mus kuanz hnhz daz tahz muz meuz hnhz keun euiz ne tahz hnhz samz putz aez ceu waasz kuanz hnhz kaw keun euiz tawiz mah paz hnhz samz cih ihz teuk ngarz keuh kuanz mah kuanz paz keui pyaw baaiz

5. Taemz lawng daehz, beuk daehz mawh tui, sunz penz naehz. Taemz yak aez yawm seu kawlz aarz thaeoz.

Kaanz Sawnz (23) A keoz ihz phawmz rak



Meuz diz neungz maang ihz phaanz tahz yah phawmz rak keu aarz. Kaar moh pruh omz kinz. Kaar tahz yah yawt ihz baaiz. Kaar rak ihz, ihz kaw rak kaar. Kaar tahz yah cih mok khrengz omz teun khinz pruh.

Naeh seu seu ngihz maang ihz hawkz truz tiangz omz a diz. Ihz an diz preumz reu thonz taw seu ngihz keutz. Nam tomz ihz, nam mawz cih khaekz yaeh. Kaar tahz yah raak hnhz truz, aez cih khaekz daehz. Kaar rak khaekz daehz baaiz.

Teuk ngup kap siz ne tahz kaang an diz lan lak sraakz. Yah kaang samz rawi miu damz khaekz daehz nahz seu tuhz kaaiz. Meuz tahz kaang phawmz rak weng truz suamz kaaiz ne khaekz an diz maat rawi. Meuz kaar tahz yah peun rawi ne a wa penz tumz khamz. Kaar tahz yah penz luat ihz maang.

Keuz daz maang ihz tahz yah phawmz wot, moh boh tuhz pruh keuh ne ngarz reu oiz an diz ne cih yeung tawiz. Kaar lan cih khrengz omz tuhz ruk. Nam maang ihz truz tiangz. Kaar tahz yah khiangz yawt klawhz seu ngihz. Naeh seu seu ngihz ihz kuangz reung dengz rae truz tiangz khrengz omz a diz.

Kaar kaw raak ihz an diz weng kaang daehz. Miu damz seu tuhz kaaiz kaw aez hnhz yaetz cih khaekz daehz. Kaar tahz yah nam yaetz, khiangz yawt ihz an diz ngaz penz tumz khamz peuk naeh ne. kaar teur rimz daehz yawt, praac seur leung ne khaekz an diz kaw doz baaiz. Khaekz an diz kaw tiunz thengz. Ihz tahz yah phawmz wot yeung tawiz ihz kaw nam bawnz naehz.

Seum Rih (23)

1. Seum rih rawz boh seum rih taemz.
khrengz, seu ngihz, seu tuhz, tumz, khamz, reung dengz, khiangz, praac, seur leung

- 2A. Tawpz anz boh nam.
 - (1) Kaar tahz yah yawt ihz baaiz, kaar rak ihz, ihz kaw rak kaar. _____
 - (2) Maang ihz hawkz truz khahz keulz a diz. _____
 - (3) Yah kaang samz nam rawi miu damz khaekz daehz nahz seu tuhz kaaiz.




 - (4) Meuz kaar tahz yah peun rawi ne a wa penz tumz khaehz.

 - (5) Nam maang ihz truz tiangz, kaar tahz yah khiangz yawt klawhz seu ngihz. _____

- 2B. Tawpz many maanyz.
 - (1) Ihz phaanz tahz yah kaar diz naeh ihz seu naez?
 - (2) Kaar tahz yah cih mok naehz teun khinz pruh?
 - (3) Kaar tahz yah raak ihz an diz weng cih naehz kaang daehz?
 - (4) Meuz kaar peun rawi khaekz ne, ihz an diz penz naehz?
 - (5) Meuz ihz phawmz wot kaar diz khiangz yawt khaekz daehz ne, khaekz kaar naeh seu naez?

- 3A. Ras sapz aez maen ti daehz. (pruh, prih, teur, taanyz, Kiarz)
 - (1) Keuh tahz yah lan _____ laas.
 - (2) Reu Yaang naeh seu naeh _____?
 - (3) Tuhz prih Khaez boh _____ Thaiz kaw maang Reu Yaang.
 - (4) Anz mih mawz _____ seun taepz?
 - (5) _____ an ni naeh seu naeh seu ngihz?

3B. Sapz teun khinz klawngz klaengz.



4. Cao khaw lik tuh z lawkz ne cih aez penz thaeoz.

Pung taek; (reu aangz, kaang) Keuh cih kaang, leh reu aangz mawh sapz tawiz teungz keun rang.

(1) (mak prit, tho)

(2) (klaai, lah z teu wahz)

(3) (cawng khlapz, satz)

(4) (simz, mawnz)

(5) (omz, yaal)

5. Taemz lawng kawp naehz daehz lo mawz lik a? Beuk daehz mawz lik ngaz maang a keoz naehz? Beuk daehz nam mawz lik samz ngaz naeh ceun nae? Taemz seu seu kawlz aarz thaeoz.

Kaanz Sawnz (24) Tahz pung naz ngaai lapz tualz



Meuz diz neungz maang tahz pung naz ngaai lapz tualz. Meuz keuh lae lan khahz keulz ne, keuh ngarz reus ihz hawkz rae keuh maanyz ihz an diz daz, “Tahz, mih truz cih naehz?” Ihz an diz kaw thaw daz. “Ohz truz khaenz siz caangz eu.” Keuh kaw teur daz daehz nahz, “Siz caangz ne naeh seu naez ez, ehz teur aacz daehz pruaszw yawt hiuz,” daz ceun ni.

An hawkz ne lan pruaszw talz toz siz caangz rae, mial truz lao plaez kuanz bohzw daehz nahz, “Siz caangz an daz ne naeh ceun taen ngohz eu.”

An keu aarz samz lan pruaszw talz keu nakz siz caangz rae, mial truz lao daz, “Siz caangz an daz ne naeh ceun teun luz eu.”

An keu waiz samz lan pruaszw talz tuiz siz caangz, mial truz lao daz, “Siz caangz an daz ne naeh ceun heunyz eu.”

Waaiz an diz, an keu ponz samz lan pruaszw talz cawng siz caangz rae mial truz lao daz, “Deuiz ohz mas tae, siz caangz ne naeh ceun keun rang kaang eu.”

An khaenz samz lan pruaszw talz keu tiakz siz caangz rae mial truz lao daz, “An pehz daz keu diz maat maang an nae anz, siz caangz an daz ne naeh ceun seum pat ngohz eu”.

An tualz samz lan pruaszw talz seun tahz siz caangz rae mial truz lao daz, “An pehz daz keu diz ne pleung hacz aamz, siz caangz an daz ne naeh ceun nuarz eu”. Daz ceun ni rae teur thiangz daehz. Ihz khaenz siz caangz an diz truz lao plaez keuh nahz kaw keuh nam yum.

Kawp ceun diz beuk mas taw thaz seu plaakz pan, nam ceuk kuz tawiz plaakz ihz tae, te lun ceun tahz pung naz ngaai lapz keu diz.

Seum Rih (24)

1. Seum rih rawz boh seum rih taemz.
tualz, siz caangz, pruas, keu nakz, teun lucz, tuiz, keu tiakz, seum pat,
seun tahz

- 2A. Tawpz anz boh nam.
 - (1) Meuz keuh lae lan khahz keulz ne keuh ngarz reus ihz hawkz. _____
 - (2) Tahz an diz daz "Ohz truz khaenz meuk eu." _____
 - (3) An keu aarz samz lan pruansz keu nakz siz caangz. _____
 - (4) An keu aarz samz lan pruas talz toz siz caangz. _____
 - (5) Anz tualz samz daz siz caangz naeh ceun nuarz. _____

- 2B. Tawpz mony maanyz.
 - (1) Maang tahz pung naz ngaai lapz seu naeh?
 - (2) Ihz an diz daz daehz anz naez?
 - (3) Ihz hawkz an lan pruas lanz loz siz caangz an diz, daz siz caangz deuz naehz?
 - (4) Anz lan pruas thaz cawng siz caangz ne daz siz caangz deuz naehz?
 - (5) Mas taw daehz nahz nam ceuk kuz thaz plaakz ihz caang naeh seu naez?

- 3A. Ras sapz aez maen ti daehz. (teunyz, praang, bongz, kraesz, keutz)
 - (1) Kio Yomz naeh thaz keun _____ Paang Longz.
 - (2) Kingz omz mawh naeh thaz reu _____ Meungz Kiungz.
 - (3) Keuh _____ khaehz sraaiz cih ceun luang.
 - (4) Seum wawh _____ truz suamz kaw khaez.
 - (5) Yah Teup cih teur lung _____ tuz.

- 3B. Sapz tawiz ti lawnz.
 - (1) Suamz kaaiz seu tuh _____?
 - (2) Pruh pehz naeh _____ naez omz mawh?

- (3) Reu Yaang meuz neungz keui mawz _____ yol baaiz.
- (4) Poz lae teuk bimz, simz lae seuk _____.
- (5) Reu Yaang kiukz sraakz _____.

4. Leh khaw lik taemz sapz tuhz lawkz.

			u						

Keuh lan maar klawhz seu ngihz.

- 5. Taemz lawng meoz an daehz thaang an rak maang naehz? An rak samz maang naehz? An nam rak keui aez bilz ne ngaz cih seu naez? Taemz seu seu kawlz aarz thaeoz.

Kaanz Sawnz (25) Na



Teu Aaiz ngaz lan na tawiz paz daehz. Paz keuh nap hnhz lan dawmz yawt na. Teu Aaiz samz nam ti cih na. Kawp daz hnhz nam mas rae paz keuh nap hnhz lan. Hnhz nam paw mas phaai.

Paz keuh bawnz lao plaez hnhz nahz, “Maang na aarz meoz. Na seu meoz samz bawnz pao omz cung caang bawnz thaiz, bawnz sawmz ne, raak na omz cung. Na thaengz seu meoz samz bawnz tengz waaiz cih rawng omz, leh sapz omz, sunz thaiz peuk naeh kaw bawnz ne naeh na omz waaiz.”

Teu Aaiz maanyz paz daehz daz, “Aez na daehz aatz ne cih seu naez paz?” Paz keuh kaw lao plaez hnhz nahz, “Beuk sunz aez na daehz aatz kaw meuz kiarz hawngz ne bawnz taw sapz nahz mun, nam anz kaw keu teh kheumz keui. Beuk naeh na omz cung, omz a wa kut tuh na kaw thaiz boh. Beuk naeh na omz waaiz samz thaiz peuk naeh kaw bawnz.

Meuz teur dokz thaiz a wa taet kaw meu rae khonz boh. Beuk a wa kaw ri, sawmz boh. Beuk naeh na omz waaiz, cih lawiz lawiz kaw bawnz. Beuk naeh na omz cung samz bawnz cih rip baaiz. Teu Aaiz kaw maanyz thaengz paz daehz “Beuk a wa sawmz samz bawnz cih naehz hoh paz?”

Paz keuh kaw lao hnhz nahz, “Bawnz yawt omz eu. Waaiz ihz sawmz ne rat thengz omz. Beuk teungz ngohz a wa reu mit kaw sapz mial omz boh. Beuk a wa thatz ihz woc tui lo rat thaengz seu laehz boh.” Ihz cih na reu baaiz. Keuz daz meuz ngohz kaaiz weng phraeo kaang daehz ne seuz phawmz baaiz.”

Teu Aaiz lao paz daehz nahz, “Paz, ohz ngaz cih damz paz ehz nahz. Kawp daz paz cih damz ehz a wa ceu nawhz baaiz. Kamz ni naeh laez ohz cih damz boh. Tawiz ti ohz nam mas, nam mawz kaw ohz ngaz maanyz paz ehz.” Kaar kuanz paz kaw teur aacz daehz seuz baaiz.

Seum Rih (25)

1. Seum rih rawz boh seum rih taemz.

omz cung, sawmz, waaiz, rawng, keu tehz, reuk dokz, teungz ngohz, rat

2A Tawpz anz boh nam.

(1) Paz keuh nap hnhz lan yawt maar. _____

(2) Maang na aarz meoz. _____

(3) Beuk sunz aez na aatz kaw meuz kiarz hawngz lo taw sapz mun. ____

(4) Beuk naeh na omz cung samz bawnz cih rip baaiz. _____

(5) Beuk teungz ngohz a wa reu mit kaw bawnz sapz thaengz omz. _____

2B Tawpz mony maanyz.

(1) Paz keuh nap Teu Aaiz anz naez?

(2) Na naeh seu naeh meoz?

(3) Beuk sunz aez na aatz lo cih seu naez?

(4) Beuk maat ri na anz caang sawmz?

(5) Beuk a wa sawmz na, bawnz cih thaengz naehz?

3A. Taemz teuk neuk toz lik.

(1) Sohz ____ tehz




(2) Siz c_____

(3) Reu w_____

(4) _____ taaiz

(5) Teur l_____

3B. Sapz teun khinz klawngz klaengz.



4. Sapz cakz deukz teur co (,) cakz deukz (.) boh khaw lawk khaw dapz (“___”).

ihz kaang keuh teu uz naeh khanz mus yah hnhz daz i mang kaar maang kuanz keur meh keu aarz boh kuanz keun nyah hawkz mus kuanz kaar daz naaoz longz naaoz kyehz boh i saz keuh moh pruh baang beunz tuhz eungz mak mong mon tuhz nae weng omz plaeh keuh naeh ihz cih suamz kaanz sraakz maar kuanz kaar keu waiz samz moh cawngz sawnz lik tuhz weng lawi laemz beuk naeh kiarz ihz preumz kaw keuh kuanz mai weng keulz mah paz daehz

5. Taemz lawng kiarz cung, kiarz hawngz boh kiarz katz. Ihz cih kaanz naehz tuhz kiarz keu diz? Kiarz an naez pehz song lak ihz? Taemz aez naeh aarz kawlz hanz thaeoz.

Kaanz Sawnz (26) Tahz tihz tawz



Maang ihz tahz yah thao keu aarz, kaar maang kuanz trawsz hawkz. Paz keuh kaw a wa thao baaiz, coh taw seu tuhz priangz. Hnhz kaw cao kuanz keun nyah daehz khahz leh tahz tihz tawz keu diz.

Keuiz daz meuz hnhz lao boh kuanz daehz ceun diz ne, maang seu naoz hawkz khiangz ngarz. Thaengz seu borz, hnhz kaw lan bitz leh mah simz sriapz rae, leh plaehz aakz daehz harz sapz kingz simz ne, hnhz kaw lan tam mok rim orz kaang trawsz.

Ceun kap siz hnhz seuk cih daehz lan dawmz. Paz keun nyah ne samz awlz, hnhz kaw maanyz seu naaoz daz, “Mih khahz naehz thuakz?” Hnhz kaw daz, “Seum wawh ohz kleoz punyz simz, ohz yiang aez tawz tawz kingz simz ne, klaez truz thaz niz. Ohz kleoz khahz daehz eunz kaw nam awlz. Paz keun nyah kaw khahz dawmz kawr hnhz, awlz simz klaez naeh boh rim kaang keuh ne. Plaehz aakz hnhz harz boh kingz simz ne rae, sangz baaiz, daz tang seu naaoz ne nahz, “Euz tihz mih baai tawz baaiz lah.”

Hnhz kaw cao kuanz keun nyah daehz leh luat tahz an diz. Pawhz keuh kaw leh aez seu naatz aez hnhz lan pao punyz petz tawz omz nawngz. Hnhz kaw a wa phraeoz tawz omz nawngz, petz kaw heungz baaiz. Hnhz kaw ngaz tang seu naatz punyz kaw nam yaak, laz kaw a wa laz, kaaiz kaw a wa coh, lang kaang kaw nam yaak weng, petz kaw nam bawnz. Pawhz keuh thaang kheuiz daehz bawnz meoz toz mawh rae, cao kuanz keun nyah daehz lan krai yawt hnhz. Meuz yah hnhz phraeoz truz ne awlz tahz daehz, taehz boh seu naatz ne rae, upz teuk khranz hnhz. Tahz hnhz kaw khranz baaiz, teuk laat tang seu naatz. Samz lan teu aez petz hawkz. Hnhz samz mial daz yah daehz nahz, “khanz daz mih nam truz tae, ohz ngaz ngawm aez keuh teur cuhz daehz caang kai punyz.”

Seum Rih (26)




1. Seum rih rawz boh seum rih taemz.
thao, seu tuhز priangz, tihz tawz, plaehz aakz, orz, kleoz, punyz, yiang,
seu naatz, petz

- 2A. Tawpz anz boh nam.
 - (1) Hnhz cao kuanz daehz leh tahz tihz tawz keu diz. _____
 - (2) “Mih khahz naehz thuakz?” Hnhz kaw daz, “Seum wawh ohz kleoz punyz
bawnz yaerz.” _____
 - (3) Awlz simz klaez naeh boh rim kaang ne. _____
 - (4) Hnhz phraeoz tawz omz nawngz nam maang naehz. _____
 - (5) Meuz yah hnhz phraeoz ne awlz tahz daehz taehz boh seu naatz.

- 2B. Tawpz mony maanyz.
 - (1) Paz keuh cao kuanz daehz leh tahz ceun nae?
 - (2) Meuz tahz seu naaoz khiangz ngarz ne hnhz cih seu naez?
 - (3) Paz keuh daz tahz seu naaoz ne naeh ihz seu naez?
 - (4) Pawhz keuh leh seu naatz aez kuanz kheuiz daehz, aez hnhz cih naehz?
 - (5) Meuz seu naatz hnhz laat ne hnhz daz yah daehz nahz seu naez?

- 3A. Ras sapz an tawz.
 - (1) Wah tho raw _____ (pauk, pukz, bukz)
 - (2) Ihz khahz rup kahz _____ heungz baaiz. (bawnz, bawn, pawnz)
 - (3) Lo tiangz lomz sinz aez daehz moh _____. (rakz, rak, lak)
 - (4) Beuk ngaz humz omz lo aez _____ ngatz caang humz. (srangz,
sraang, sraangz)
 - (5) Toz daehz kaw lo _____ la se se aez mok rak. (lum, lumz, rum)

3B. Sapz teun khinz klawngz klaengz.



4. Aarz khaw cih seu thaeoz. Aez naeh ta 5 thaeoz.
(kawngz, reu) (suamz, mok) (keu seh, nam moh rak) (klungz suhz, seuk neum) (woi, hawlz)
5. Taemz lawng cih maar ngohz, meuz seun teungz plihz taw tiz ngohz.
Bawnz cih ceun nae? Bawnz lum la ceun nae? Taemz aez naeh seu seu kawlz hanz thaeoz.

Kaanz Sawnz (27) Ceun ngur mas kung



Maang prih seu ti, maang khunz haw khamz maang pinya kyahz baaiz. Sangz daz toz satz boh teungz khaehz keui kaw mas hacz aamz. Naeh seu seu ngihz maang mah ceun ngur hawkz longz reung dengz samz lan praeoz tawz khunz haw khamz ne. Khunz haw khamz kaw mah ceun ngur rae, mah ceun ngur kaw seuz baaiz. Meuz mah ceun ngur ne ngaz weng, hnhz kaw daz, “Seu ngihz cao cao, ohz te tawpz meu rae kung tahz ehz.”

Lawng khunz haw khamz maang pinya ne, reu oiz hnhz kaw thanz paw sirz lan hacz klawhz ti. Naeh seu seu ngihz, maang naang haw khamz thaengz seu prih, hnhz sunz caam yawt nyaan pinya khunz haw khamz ne rae hnhz kaw a wa praeoz truz.

Keun nyah an diz kaw caam yawt khunz haw khamz aarz laehz neuk neuk, khunz haw khamz an maang nyaan pinya ne kaw mial meu rae tawpz bawnz hacz aamz. Hnhz sunz caam thaengz laehz thaz puatz boh.

Hnhz kyaam cih aez khunz haw khamz, bawnz keu seh z aacz ngaai ihz tang heungz. Hnhz cao teu paez daehz cih daakz phiangz si an nam caet, seu peur ya pawz. Tuhz diz samz un z mok daakz phiangz si an caet seu pawz rae, aez khunz haw khamz ne nam mas, rah cih mok ceun diz. Keuh a wa cih mok aacz thaz meuz teun yaan.

Meuz phraeoz truz seu ngihz pawiz longz ne, keun nyah ne maanyz tawz khunz haw khamz, aacz ngaai ihz tang heungz luat. khunz haw khamz nam tawpz bawnz luat rae ngaai hnhz nam aatz leui, waaiz ngaai cu luat thaz tuh z peu taengz.

Meuz diz luat hnhz tang mony reu ma mah ceun ngur ne, daz mok daehz nahz. Meuz phangz an diz mah ceun ngur kaw praeoz truz peurz khahz dawmz yawt daakz keu diz. An nae naeh an caet, a wa mas kaw truz lao luat khunz haw khamz.

Kawp ceun ngur mas kung rae khunz haw khamz ne bawnz mawk, bawnz mael aacz ngaai ihz heungz.

Seum Rih (27)

1. Seum rih rawz boh seum rih taemz.

khunz haw khamz, pinya, toz satz, teungz khaehz, mah ceun ngur, kung,
daakz pyiangz si, seu peur ya, pawiz longz, pawz

2A Tawpz anz boh nam.

(1) Mah ceun ngur longz reung deng phraezoz truz tawz khunz haw khamz.

(2) Naang haw khamz maanyz khunz waiz laehz. _____

(3) Khunz haw khamz kawr mah ceun ngur kaw, mah ceun ngur nam seuz.

(4) Tuhz diz unz mok daakz phiangz si an caet seu pawz. _____

(5) Mah ceun ngur a wa mas an caet kaw nam lao mial khunz. _____

2B Tawpz mony maanyz.

(1) Tahz khunz haw khamz an diz naeh ihz seu naez?

(2) Naang haw khamz caam yawt khunz seu naeh laehz?

(3) Naang haw khamz sunz cih aez khunz naeh seu naez?

(4) Daakz phiangz si an caet naeh seu naeh pawz?

(5) Meuz phangz an diz mah ceun ngur ne cih seu naez?

3A. Taemz teuk neuk toz lik.

(1) Teur lung p_____




(2) Mak p____ nukz

(3) B_____ kheumz

(4) Plaehz s____ pirz

(5) Kl_____ ta

3B. Sapz teun khinz klawngz klaengz.



4. Sapz cakz deukz teur co (,) cakz deukz (.) boh khaw lawk khaw dapz (“___”).

peur taaiz lan lao cakz ngeh daz aaiz wang teur caap khehz hiuz cakz ngeh kaw daz nam ohz nam rany bawnz mih keuz daz peur taaiz pae suamz hnhz ka nam kai cakz ngeh kaw khahz lao mok boh raen daehz hacz aamz boh raen hnhz kaw kawr hnhz meuz a wa phraez seu ngihz kaar teur caap ne kaar kaw wang meuz peur taaiz ngaz phraez ti lao mok ne cakz ngeh tan aacz se se cakz ngeh kaw a wa pae

5. Beuk daehz damz suamz meuk kaang daehz, ihz cih seu naez damz? Bawnz khaenz ceun nae? Bawnz lum la ceun nae? Bawnz cih khawk ceu nae? Seu naeh wit maang kuanz keu ni. Taemz seu seu kawlz hanz thaeoz.

Kaanz Sawnz (28) Laai damz yaerz



Yah Lu keuh kuanz mah moh pruh Reu Yaang. Hnhz naeh yah keu maaiz. Hnhz maang kuanz keun nyah hawkz pan. Ihz kaang keuh naeh taw keu aarz pan. Kaar kuanz mah damz suamz yaerz. Yaerz keuh kaw heungz mawn mawn. Mah keuh tang hacz aamz yaerz daehz.

Kuanz hnhz maanyz hnhz daz, “Mah, yaerz tum tamz seu naeh seu ngihz lah mah?” Mah keuh lao plaez hnhz nahz, “Aarz kawlz disz seu ngihz. Beuk ohz lao kaw tang mok lawh.” Kuanz hnhz kaw tang mok.

Mah keuh lao plaez hnhz nahz, “Mah yaerz maang kuanz, beuk a wa bawnz aarz waiz kiarz kaw praasz kuanz. Teur wit ne maang kuanz aarz cup taw waiz cup. Beuk naeh kheuz kawmz kaw nam lo mok ceu. Yaerz ok ne lo yal leh khawz khawz leun.” Kuanz hnhz kaw teuk ngarz rak baaiz.

Mah keuh kaw siupz lao thaengz, “Kuanz yaerz reng ne beuk a wa bawnz hanz kiarz keu ni a wa seum rih keu dawrz. Yaerz nyaangz kaw seun teungz tawiz yaerz reng. Yaerz nyaangz keui beuk keuh sunz tamz kaw khahz ti tamz

boh. Awlz ohz bawnz cih aez se se keuh nahz. Aarz ngaai lan mih lo cih aez boh keuz.”

Kuanz hnhz kaw teuk ngarz an hnhz lao. Kuanz hnhz maanyz thaengz mah daehz, “Anz bawnz damz hoh mah?” Mah keuh kaw lao plaez thaengz, “Bawnz damz lawh, beuk nam damz kaw keuh hinz mawhz baaiz. Phrihz phrahz ihz kaw keuh khahz ya eu.” Kuanz hnhz kaw maanyz thaengz, “Bawnz damz nahz naehz hoh mah?” Mah keuh kaw lao daz, “Khaamz macz, kaaiz ducz, kaaiz sinz, kaw khaez keu ni. Omz tiangz kaw sapz aez klawhz seu ngihz.

Yak aez maang sahz yaerz ne lo thitz aez seu neumz klawhz kiarz. Meuz yaerz tum plakz kaw bawnz yawt rak baaiz. Bawnz wah lak aakz boh klaangz keui. Meuz teuk bimz kaw sapz mok tuhz laooz daehz rak rak.” Kuanz hnhz kaw teuk ngarz rak baaiz. Keuh kuanz mah nam cih maar, damz suamz yaerz pan, kawp keuh damz rak baaiz rae kumz suamz paw leuz.

Seum Rih (28)

1. Seum rih rawz boh seum rih taemz.

yaerz, yaerz ok, khaamz wacz, kaaiz ducz, kaaiz sinz, kaw khaez, sahz yaerz, lak aakz, klaangz, laaoz.

2A. Tawpz anz boh nam.

(1) Kaar kuanz mah damz yaerz kaw heungz mawn mawn. _____

(2) Kuanz yaerz reng ne a wa bawnz hanz kiarz kaw nam seum rih keu dawrz. _____

(3) Beuk nam damz kaw hinz mawh baaiz. _____

(4) Lak aakz kaw nam bawnz wah. _____

(5) Meuz teuk bimz kaw lo sapz tuhaz laaoz yaerz rak rak. _____

2B. Tawpz mony maanyz.

(1) Yah Lu kaar kuanz mah cih suamz kaanz naehz?

(2) Mah keuh daz yaerz tum tamz seu naeh seu ngihz?

(3) Yaerz nyaangz beuk keuk sunz tamz cih seu naez?

(4) Mah keu lao kuanz daehz ihz leh naehz damz yaerz?

(5) Yak aez maang sahz yaerz ne lo cih seu naez?

3A. Tak mony an naeh thaz wa.

(1) Nuarz peur tahz, lahz keu aarz. _____

(2) Ihz cak makz thaz kingz, hnhz cak thaz cawng. _____

(3) Ihz seuk ngaen aez tuhaz raw, hnhz seuk ngaen aez tuhaz cur. _____

(4) Lan tuhaz ruk penz klaangz, moh lang kaang penz pakz. _____

(5) Ihz pumz yaam, ihz plawiz pras. _____

(6) Ihz heungz baaiz moh kaang kawmz, nam teur awlz daehz. _____




(7) Cingz daz naeh mah, samz moh tuhaz klungz kuanz. _____

(8) Saemz daz kaang, Reu Yaang daz seu. _____

(9) Saemz daz paang, Reu Yaang daz peur. _____

(10) Ihz keu waiz weutz kawmz kawmz seum weutz hawkz. _____

3B. Sapz teun khinz klawngz klaengz.



4. Aarz khaw cih _____ seu thaeoz. Aez naeh ta 5 thaeoz.
(sraakz, keu dohz) (mak prit, teur lung) (reungz, yaerz) (meuk, nuar)
(peu nahz, maar)
5. Taemz a pum an daehz song.

Kaanz Sawnz (29) I Paai kaar I Yo



Meuz diz maang keun nyah keu aarz. Hawkz naeh I Paai, thaengz hawkz samz daz I Yo. Kaar kai khahz saz plaehz phrihz phrahz tuhz ruk. Naeh seu laehz I Paai saz plaehz reum daelz, I Yo samz saz seum aaz. Kaar phraeoz tuhz teur laas ne, ihz daz I Paai nahz, “Ez, I Naangz khaai mak tiz naw.” I Paai kaw daz, “Saemz keu ni caang daz a naez kaw naeh ti daehz ceun diz lah.” Daz ceun diz kaw thawkz aez ihz keui nahz plaehz reum daelz daehz ne.

Saemz teur ka kaw daz I Yo nahz, “Ez, I Naangz khaai mak kaw naw.” I Yo kaw daz, “Saemz keu ni, an nae kaw daz daehz naeh kuanz mai Teu Kawz lah.” Daz ceun diz kaw aez maat ihz nahz cakz seum aaz daehz. kawp daz hnhz thaang ihz keu diz naeh kuanz mai tahz daehz Teu Kawz.

Meuz kaar teur awlz daehz ne I Paai kaw daz I Yo nahz, “Ohz saz a naez kaw Saemz keui daz naeh ti daehz da. Ohz kaw aez maat keuh nahz.” I Yo kaw daz, “Ohz kaw anz, “An nae kaw daz daehz naeh kuanz mai keuh Teu Kawz da. Ohz kaw aez maat keuh nahz hacz aamz.”

Ihz samz peun yawh I Yo nahz kong koc. Hnhz cao I Paai tahz maanyz aez. I Paai kaw tahz maanyz daz, “Tawngz tawngz taengz taengz thael lael lael am miz haz Pi Caaiz?” Ihz an diz kaw daz hnhz naehz, “Naz ma lae puz.” I Paai kaw daz I Yo nahz, “Keuh Omz Plaeh a wa khyuk hacz da Yo.”

Kaar kaw ngaz weng, ihz samz seumz peun weng kaar ngungz. Ihz samz upz kaar nahz mony Saemz, “Paat te maz, ao maz paek nam nam naz.” Kaar kaw thaang ihz maanyz paekz. I Yo kaw aez ihz an diz nahz paekz an ihz peun yawh kong koc. I Paai samz nam maang paekz aez. Kaar kaw tiunz. Ihz samz raak daz tawiz puatz kaar nahz, “Ya pe paai.” Kaar kaw ngarz. I Yo kaw daz I Paai nahz, “Keuh rawhz daz mih nam phre bawnz da Paai.” Kaar baaiz tiunz thaengz. Kaar nam yak khahz saz thaengz seu pawk leui.

Seum Rih (29)

1. Seum rih rawz boh seum rih taemz
tuhz ruk, reum daelz, seum aaiz, teur laas, Saemz, Teu Kawz, kong koc,
ngungz, kuanz mai, phre, tiunz

2A. Tawz anz boh nam.

(1) I Paai kaar I Yo kai leh saz phrihz phrahz tuhz ruk. _____

(2) Naeh seu laehz I Paai saz plaehz peun ruh, I Yo saz cakz keu wiasz.

(3) An nae kaw daz daehz naeh kuanz mai Tahz Komz. _____

(4) Kaar kaw ngaz weng, ihz samz seumz peun weng kaar nahz ngungz.

(5) I Yo kaw leh langz kong koc, weng mial. _____

2B. Tawpz mony maanyz.

(1) I Paai kaar I Yo kai saz naehz?

(2) Meuz kaar phraez tuhz teur laas ne, Saemz keui daz I Paai nahz seu
naez?

(3) I Paai kaar I Yo teur daz daehz nahz seu naez?

(4) I Yo cao I Paai maanyz khahz kong koc ne, I Paai maanyz daz seu naez?

(5) Meuz ihz seumz kaar nahz ngungz ne, kaar thaang ihz daz daehz nahz
naehz?

3A. Mah aez naeh r, m, saat aez naeh ng, n, k, taemz seu kawlz toz. Beuk lo
sapz reus kaw bawnz boh. Pung taek: reungz

(1) r_____ng

(2) r_____ng

(3) r_____ng

(4) m_____ng

(5) m_____n

(6) m_____n

(7) m_____n

(8) m_____k

(9) m_____k

(10) m_____k

3B. Leh khaw lik taemz sapz tuhz lawkz.

						t		w		
t			r							
						t		a		
	p			r	t					
						d				

Peur taaiz tang reu waai plaai reung dengz teur tawiz.

4. Sapz cakz deukz teur co (,) cakz deukz (.) boh khaw lawk khaw dapz (“_____”).

meuz diz neungz maang peur taaiz boh reu waai keuh moh tuhz ruk naeh seu laehz reu waai ta peur taaiz wiurz teur caap reu waai daz peur taaiz nahz beuk mih nam pae ohz kaw ohz ngaz suamz maai mih peur taaiz kaw nam caang cih seu naez reu waai tawnz kawnz reu aangz peur taaiz samz tawnz mah keun durz reu waai maanyz peur taaiz daz mih tawnz mok naeh lah peur taaiz kaw daz ohz tawnz reu aangz krong reu waai wiurz lan yaan baaiz kawp daz keum rang hnhz mawh peur taaiz wiurz thaz puatz baaiz lan yaan boh peur taaiz kaw pae reu waai

5. Taemz lawng daehz seun teungz rawi taw seu ngihz keutz cih kaanz naehz? Taemz seu seu kawlz hanz thaeoz.

Kaanz Sawnz (30) Yen ngae waiz meoz



Temz thao temz plung keui lo mas plaakz yen ngae. Beuk nam maang reung dengz yen ngae ne ngaz penz ihz nam mas naehz, ehz te nam deuiz ihz. Lawng yen ngae ta kuanz ihz plung Reu Yaang an lo mas, an lo tang klawhz seu ngihz ne naeh toz yen ngae, mony yen ngae boh phawmz yen ngae.

Toz yen ngae an daz ne mawz kongz kongz lan aacz ngaai sra, mah, paz, ihz mawh pan nam anz. Tawiz kaanz an ehz cih klawhz meoz, meuz keu dez, meuz ceng, meuz lan, meuz yaetz ne lo bawnz cih tawiz reung dengz yen ngae klawhz lawng. Meoz an peuk ceuh, ceun seu az, yangz keu tiakz, yangz ngaai keu ni yak aez car plaetz aacz ngaai ihz. Lo kai watz, lo kai lum la, kai kaas kingz, raiz reum himz tihz, reum himz cawng. Kreung kap kaw lo kai seuk tuhaz, yak aez uiz hawtz sraangz, hawtz keu muhz. Lo kap an kiungz daehz. Lan thaz naez, nuar thaz naez kaw yak keulz pungz, keulz ruakz. Kap sawkz tinz, cawng khlapz rak rak. Ngaz keu dez a naez kaw yawt rak rak caang kai keu dez. Beuk cih ceun ni bawnz daz toz yen ngae eu.

Mony yen ngae an daz ne naeh mawz upz, mawz reu ma klawhz lawng eu. Keuiz daz mony reu ma ngaam rae kaoz suamz kaw nam anz mony yen ngae. Naeh an hiutz ihz, khaw anz boh reus nam anz kaw maat anz ihz yen ngae lawh. Bawnz reu ma keu ceum, lao mony reu ma keu sangz aez lan trohz keu tiakz klawhz ihz. Meuz talz

ihz mawh ne, bawnz tak aacz keuh rae lo reu ma taw keuh. Upz taw kuanz boh kuanz raen kaw yak aez pa mony reu ma ihz suhz phawmz. Talz meuz nam sang trohz ne, beuk cih maen ihz talz suhz kaw, lo maanyz tawngz paan luat. Talz meuz cih teuk luh phrihz phrahz keui kaw yak unz, lo lao keu sangz, an keu ni bawnz daz mony yen ngae eu.

Phawmz yen ngae ne naeh phawmz keu sangz rak, phawmz nimz rak. Meuz mah paz daehz sawnz ne lo tang mok rak rak. Mok phawmz nimz nimz rae lo daz lik. Mok phawmz rak rak tawz kuanz boh kuanz raen. Beuk khahz awlz ihz maang reung dengz kreuk kaw lo mok phawmz rak rak rae kawr. Reung dengz meukz, reung dengz raai an daz ne lo mok phawmz daz nam cih seu pawk. Nam lo maang phawmz cih aez ihz luh, cih aez daehz rak. Talz meuz reung dengz sunz ca lae truz kaw nyeun bawnz bawnz, an keu ni bawnz daz phawmz yen ngae eu.

Seum Rih (30)

1. Seum rih rawz boh seum rih taemz.

Yen ngae, kongz kongz, keu dez, ceng, yaetz, keu ceum, tawngz paan, keu sangz, sunz ca, nyeun

2A. Tawpz anz boh nam.

(1) Beuk nam maang reung dengz yen ngae kaw, nam cih naehz. ____

(2) Reung dengz yen ngae naeh aarz meoz. ____

(3) Toz yen ngae ne mawz kongz kongz lan aacz ngaai sra, mah, paz, ihz mawh. ____

(4) Mony yen ngae an daz ne naeh mawz upz, mawz reu ma klawhz lawng.

(5) Phawmz yen ngae ne naeh phawmz keu sangz rak, phawmz nimz rak.

2B. Tawpz mony maanyz.

(1) Tuhz lawng an ni, taemz mok lawng yen ngae seu naeh meoz?

(2) Toz yen ngae ne lo cih seu naez? Tawpz aez waiz meoz.

(3) Mony yen ngae ne lo cih seu naez? Tawpz aez waiz meoz.

(4) Phawmz yen ngae ne lo cih seu naez? Tawpz aez waiz meoz.

(5) Meuz moh tawiz kaang daehz ne maang reung dengz yen ngae ceun nae?

3A. Sapz tawiz ti lawnz.

- (1) Suamz yak aez naeh ceun ngal kat _____, cih yak aez naeh ceun ngal kat khaamz.
- (2) Klohz boh _____, caang teur lawz.
- (3) Tahz, lahz teun _____. Timz lahz imz krim.
- (4) Nam anz yaz _____, nam maang yaz iz.
- (5) Kh daz khetz, tang petz _____ tuhz omz.

3B. Leh khaw lik taemz sapz tuhz lawkz.

			k						
									p
	k								
z									
c						s			
				d					

Keuh khatz phawmz cih kaanz daehz klawhz seu ngihz.

4. Cao khaw lik tuhz lawkz ne cih aez penz thaeoz.

Pung taek; (meuk, khaehz) Meuk tukz mok a teungz khæehz ne.

- (1) (ngal, sroz)
 - (2) (keu dohz, laangz wah)
 - (3) (ngawng, plahz)
 - (4) (law li, reungz)
 - (5) (kaaiz, lik)
5. Co daehz sawnz tuhz pap an ni, maang seum tang naehz? Penz daehz nahz a keoz naehz?